



## COMUNA DE OTZANA

### REGULAMENTU PRO SU FUNTZIONAMENTU DE SU CUSSIZU DE SA COMUNA

APROVADU CUN DELIBERATZIONE C. C. N° 4 DE SU 23/01/2006

|   |          |
|---|----------|
| <b>Parte I - ORGANIZATZIONE DE SU CUSSIZU DE SA COMUNA.....</b>   | <b>4</b> |
| <i>Capo I – DISPOSIZIONES ZENERALES.....</i>  | <i>4</i> |
| ART. 1 – Regulamentu Finalidades.....   | 4        |
| ART. 2 - Interpretatzione de su regulamentu.....  | 4        |
| ART. 3 - Durada in càrriga de su Cussizu.....   | 4        |
| ART. 4 - Sa sede de sas adunàntzias.....  | 4        |
| <i>Capo II – SU PRESIDENTE.....</i>   | <i>5</i> |
| ART. 5 - Presidèntzia de sas adunàntzias .....  | 5        |
| ART. 6 - Còmпитos e poderes de su Presidente.....   | 5        |
| <i>Capo III - SOS GRUPOS DE SU CUSSIZU .....</i>  | <i>5</i> |
| ART. 7 - Costituzione .....   | 5        |
| <i>Capo IV - COMMISSIONES DE SU CUSSIZU PERMANENTES.....</i>  | <i>6</i> |
| ART. 8 - Costituzione e cumpositzione .....   | 6        |
| ART. 9 - Presidèntzia e cunvocatzione de sas commissiones.....  | 6        |
| ART. 10 - Funtzionamentu de sas commissiones de su Cussizu<br>permanentes.....  | 7        |
| ART. 11 - Funtziones de sas commissiones de su Cussizu<br>permanentes.....  | 7        |
| ART. 12 - Segreteria de sas commissiones de su Cussizu permanentes.<br>Verbales de sas riuniones. Pubblìtzitate de sos traballos..... | 8        |
| <i>Capo V - COMMISSIONES ISPETZIALES.....</i>   | <i>8</i> |
| ART. 13 - Commissiones de indàzine riservata.....   | 8        |
| ART. 14 - Commissiones di istùdiu e cunsultas .....   | 9        |
| <i>Capo VI – SOS CUSSIZERIS ISCRUTADORES .....</i>  | <i>9</i> |
| ART. 15 – Disinnu e funtziones.....   | 9        |

|  |    |
|--|----|
| <b>Parte II - SOS CUSSIZERIS DE SA COMUNA</b> .....                                      | 10 |
| <i>Capo I - NORMAS ZENERALES</i> .....   | 10 |
| ART. 16 - Riserva de leze.....   | 10 |
| <i>Capo II - CUMINTZU E AGABU DE SU MANDADU ELETIVU</i> .....                            | 10 |
| ART. 17 - Intrada in càrriga cumbàlida .....   | 10 |
| ART. 18 - Dimissiones .....  | 10 |
| ART. 19 - Decadèntzia e catzadura dae sa càrriga.....                                    | 11 |
| ART. 20 - Suspensione dae sas funtziones.....  | 11 |
| <i>Capo III -</i>  |    |
| <b>DIRITOS</b> .....   | 12 |
| ART. 21 - Diritu de initziativa.....   | 12 |
| ART. 22 - Diritu di presentazione de interrogatziones, interpellàntzias e motziones..... | 13 |
| ART. 23 - Dimanda de cunvocatzione de su Cussizu .....                                   | 13 |
| ART. 24 - Diritu de informatzione e de atzessu a sos atos amministrativos.....           | 14 |
| ART. 25 - Facultade de bisione de sos atos.....  | 14 |
| <i>Capo IV - ESERTZÌTZIU DE SU MANDADU ELETIVU</i> .....                                 | 14 |
| ART. 26 - Diritu de esertzìtziu de su mandadu eletivu .....                              | 14 |
| ART. 27 - Proibidura de mandadu imperativu .....   | 15 |
| ART. 28 - Partecipatzione a sas adunàntzias .....  | 15 |
| ART. 29 - Astensione obligatòria .....   | 15 |
| ART. 30 Responsabilidade personale - Esòneru.....  | 15 |
| <i>Capo V - NÒMINAS E INCÀRRIGOS A SOS CUSSIZERIS DE SA COMUNA</i> .....                 | 16 |
| ART. 31 - Indiritzos pro sas nòminas de cumpetèntzia de su Sìndigu ...                   | 16 |
| ART. 32 - Nòminas e disinnos de sos cussizeris de sa Comuna.....                         | 16 |
| ART. 33 - Funtziones rapresentativas .....   | 16 |
| <b>Parte III - FUNZIONAMENTU DE SU CUSSIZU DE SA COMUNA</b> .....                        | 16 |
| <i>Capo I -</i>  |    |
| <b>CUNVOCATZIONE</b> .....   | 16 |
| ART. 34 - Cumpetèntzia .....   | 16 |
| ART. 35 -Cunvocatzione.....  | 17 |
| ART. 36 - Òrdine de sa die .....   | 17 |
| ART. 37 - Avisu de cunvocatzione - Cunsinna - Modalidades .....                          | 18 |
| ART. 38 - Avisu de cunvocatzione - Cunsinna - Tèrmines .....                             | 18 |

|  |    |
|--|----|
| ART. 39 - Òrdine de sa die- Pubblicatzione e difusione .....       | 19 |
| <b>Capo II - ORDINAMENTU DE SAS ADUNÀNTZIAS</b> .....              | 19 |
| ART. 40 - Depòsitu de sos atos.....                                | 19 |
| ART. 41 - Adunàntzias de prima cunvocatzione .....                 | 19 |
| ART. 42 - Adunàntzias de segunda cunvocatzione.....                | 20 |
| <b>Capo III - PUBBLITZITADE DE SAS ADUNÀNTZIAS</b> .....           | 21 |
| ART. 43 - Adunàntzias pùbblicas.....                               | 21 |
| ART. 44 – Rezistratziones àudio e vido.....                        | 21 |
| ART. 45 - Adunàntzias secretas .....                               | 21 |
| ART. 46 - Adunàntzias “abertas” .....                              | 22 |
| <b>Capo IV - DISSIPLINA DE SAS ADUNÀNTZIAS</b> .....               | 22 |
| ART. 47 - Cumportamentu de sos cussizeris .....                    | 22 |
| ART. 48 - Òrdine de sa discussione.....                            | 22 |
| ART. 49 - Cumportamentu de su pùbblicu .....                       | 23 |
| ART. 50 - Ammissione de funtzionàrios e consulentes in àula .....  | 23 |
| <b>Capo V - ÒRDINE DE SOS TRABALLOS</b> .....                      | 24 |
| ART. 51 - Òrdine pro chistionare sos argumentos.....               | 24 |
| ART. 52 - Discussione - Normas zenerales .....                     | 24 |
| ART. 53 - Chistione prezuditziale e suspensiva.....                | 25 |
| ART. 54 - Fatu personale.....                                      | 25 |
| ART. 55 - Tèrmine de s’adunàntzia.....                             | 25 |
| <b>Capo V - PARTECIPATZIONE DE SU SEGRETÀRIU DE SA COMUNA</b>      |    |
| <b>VERBALE</b> .....   | 26 |
| ART. 56 - Sa partecipatzione de su Segretàriu a s’adunàntzia ..... | 26 |
| ART. 57 - Su verbale de s’adunàntzia - Redatzione e firma.....     | 26 |
| <b>PARTE IV - SAS DELIBERATZIONES</b> .....                        | 26 |
| <b>Capo I - SAS DELIBERATZIONES</b> .....                          | 26 |
| ART. 58 - Verbale – Depòsitu .....                                 | 26 |
| ART. 59 - Forma e contenidos .....                                 | 27 |
| ART. 60 - Aprovatzione - Rèvoca - Modìfica.....                    | 27 |
| <b>Capo II - SAS VOTATZIONES</b> .....                             | 28 |
| ART. 61 - Modalidades zenerales .....                              | 28 |
| ART. 62 - Votatzione in forma patente.....                         | 29 |
| ART. 63 - Votatzione pro apellu pro nùmene .....                   | 29 |
| ART. 64 - Votatziones secretas .....                               | 29 |
| ART. 65 - Èsitu de sas votatziones.....                            | 30 |

|  |    |
|--|----|
| ART. 66 - Deliberatziones eseguibiles deretu ..... | 31 |
| <i>Parte V - DISPOSIZIONES FINALES</i> .....       | 31 |
| ART. 67 - Intrada in vigore.....                   | 31 |
| ART. 68 - Difusione .....                          | 31 |

## **Parte I - ORGANIZZAZIONE DE SU CUSSIZU DE SA COMUNA**

### *Capo I* **DISPOSIZIONES ZENERALES**

#### **ART. 1 - Regulamentu Finalidade**

1. Su funtzionamentu de su Cussizu de sa Comuna est disciplinadu dae su TUEL aprovalu cun D. lzs. 18/8/2000 n°267, dae s'Istatutu e dae su regulamentu presente chi realizat cantu istabilit s'art. 5 de s'ordinamentu de sas autonomias locales.

2. Cando durante sas adunàntzias si presentant situatziones chi non sunt disciplinadas dae sa leze, dae s'Istatutu e dae su regulamentu presente, sa detzisione est adotada dae su Sìndigu, in calidade de Presidente de s'òrganu de su Cussizu tenende comente riferimentu sos printzìpios zenerales de sos ordinamentos mentovados in antis, intesu su pàrrere de su Segretàriu de sa Comuna.

#### **ART. 2 - Interpretatzione de su regulamentu**

1. Sas etzetziones fatas essire a campu dae sos cussizeris de sa Comuna a foras de sas adunàntzias, chi pertocant s'interpretatzione de normas de su regulamentu presente divent èssere presentadas, in forma iscrita, a su Sìndigu.

2. Su Sìndigu incàrriga deretu su Segretàriu de sa Comuna de ammaniare sa pràtica cun su pàrrere suo e sutaponet sa matessi, in pagu tempus, a su Cussizu de sa Comuna, chi detzidet cun su votu favorèvole de sa majoria de sos cussizeris presentes.

3. Sas etzetziones fatas essire a campu dae sos cussizeris de sa Comuna durante s'adunàntzia, chi pertocant s'interpretatzione de normas de su

regulamentu presente dae sighire pro chistionare de argumentos iscritos in s'òrdine de sa die, sunt sutapostas in forma iscrita a su Presidente. Custu suspendet pro pagu tempus sa riunione pro esaminare e risolvere sas etzetiones dae fàghere essire a campu. Cando sa soluzione non risultat possibile deretu, su Presidente, cando sunt cumintzados un'àtera bia sos traballos de su Cussizu, ispostat sa riunione a un'àtera data o rinviat s'argumentu ozetu de s'etzetione a s'adunàntzia chi sighit. In sas dies chi sighint ativat sa protzedura chi si descrivet in su segundu comma.

4. S'interpretazione de sa norma tenet balididade permanente e pro su chi pertocat sa matessi non sunt ammitidas a esàmene àteras etzetiones.

### **ART. 3 - Durada in càrriga de su Cussizu**

1. Su Cussizu de sa Comuna cumintzat s'atividade sua cun sa cunbàlida de sos cussizeris eletos e abbarrat in càrriga finas a s'etzione de su Cussizu nou, faghende petzi, a pustis de sa publicatzione de su decretu de indizione de sos cumìtzios elettorales, s'adotzione de sos atos urzentes e improrogàbiles. Sos atos divent cuntènnere s'indicazione de sos motivos e s'urzèntzia chi fagant netzessària s'adotzione.

### **ART. 4 - Sa sede de sas adunàntzias**

1. Sas adunàntzias de su Cussizu si faghent, a su sòlitu, in sa sede de sa Comuna, in sala tzìvica idònea.

2. Sa parte printzipale de sa sala, arredada cun dignidade e frunida in manera addata, est destinada a sos cumponentes de su Cussizu de sa Comuna e a su Segretàriu. Unu tretu idòneu est riservadu a su pùbblicu, asseguende a su matessi sa possibilidade de sighire mezus sos traballos de su Cussizu.

3. Su Sìndigu istabilit chi s'adunàntzia de su Cussizu si fatzat in manera istraordinària in unu logu diferente dae sa sede de sa Comuna, cando custa variatzione siat netzessària pro s'inazibilibidade o indisponibilibidade de sa sede matessi, o siat motivadu dae rajones de caràtere sotziale chi faghent ritènnere cumbeniente sa presèntzia de su Cussizu in ue si verìficant situatziones particulares, esizèntzias e avvenimentos chi bisonzant de s'impignu e sa solidariedade zenerale de sa comunidade.

4. Sa sede in ue si faghet s'adunàntzia de su Cussizu de sa Comuna devet èssere semper inditada in s'avisu de cunvocatzione.

5. Sa die chi si faghet s'adunàntzia a foras de sa sede est esposta sa bandera de s'Istatu de s'Europa, de sa Regione Autonoma de sa Sardigna e a bortas sa de sa Comuna.

## *Capu II* **SU PRESIDENTE**

### **ART. 5 – Presidèntzia de sas adunàntzias**

1. Su Sìndigu est, pro leze, su Presidente de sas adunàntzias de su Cussizu de sa Comuna.

2. Cando mancat o est impedidu su Sìndigu sa presidèntzia est de su Cussizeri antzianu e cando finas custu siat assente o impedidu, est de sos àteros cussizeris de sa Comuna, segundu s'òrdine dadu dae su nùmeru de votos otènnidos.

### **ART. 6 - Còmputos e poderes de su Presidente**

1. Su Presidente rapresentat su Cussizu de sa Comuna intera, nde amparat sa dignidade in su ruolu e assegurat s'esertzìtziu de sas funtziones a su matessi atribuidas dae sa leze e dae s'Istatutu.

2. Providet a su funtzionamentu bonu de s'assemblea de su Cussizu, mòderat sa discussione de sos argumentos e istabilit chi sos traballos si fatzant respetende su regulamentu presente. Dat sa facultade de faeddare e istabilire su tèrmine de sa discussione. Istabilit e pretzizat sos tèrmines de sas propostas chi si discutent e si votant, determinat s'òrdine de sas votatziones, nde controllat e proclamat su risultadu.

3. Su Presidente esertzitat sos poderes netzessàrios pro mantènnere s'òrdine e pro assicurare s'osservàntzia de sa leze, de s'istatutu e de su regulamentu. In s'esertzìtziu de sas funtziones suas su Presidente tenet comente riferimentu sos critèrios de impartzialidade, intervenende a defensa de sas prerogativas de su Cussizu e de sos cussizeris s'ingulos.

*Capu III*  
**SOS GRUPOS DE SU CUSSIZU**

**ART. 7 – Costituzione**

1. Sos cussizeris eletos in sa lista matessi formant, a su sòlitu, unu grupu de su Cussizu.
2. Cada grupu est costituitu dae su nessi n. **2** cussizeris. Cando una lista presentada a sas eletziones apat àpidu eletu petzi unu cussizeri, a custu sunt riconnòschidas sas prerogativas e sa rapresentàntzia chi sunt dadas a unu grupu de su Cussizu.
3. Sos grupos s'ingulos chi sunt istados eletos divent comunicare pro iscritu a su S'indigu e a su Segretàriu de sa Comuna, su nùmene de sos Capugrupos. Cun sa matessi protzedura ant a dèvere èssere signaladas sas variatziones de sa persone de su Capugrupu. Cando non sunt fatas custas comunicatziones, est cunsideradu Capugrupu de sa majoria su cussizeri de su grupu, chi no est cumponente de sa Zunta, chi apat àpidu sa majoria de sos nùmeros de votos, e pro sa minoria sos candidados S'indagos no eletos.
4. Su cussizeri chi cheret fàghere parte de unu grupu diferente dae su grupu in ue est istadu eletu lu devet comunicare a su S'indigu e a su Segretàriu de sa Comuna, aunende sa deccrarazione de atzetazione dae parte de su Capugrupu de appartenèntzia noa, tenende in cunsideru su requisidu sinzadu in su comma 2 chi benit in antis de s' artìculu presente.
5. Su cussizeri chi s'istacat dae su grupu in ue est istadu eletu e non aderit a àteros grupos non tenet sas prerogativas chi devet tènere su grupu de su Cussizu. Cando prus cussizeris s'agatent in custa cundizione, podent costituire unu grupu mistu chi elezet in s'internu suo su Capugrupu. De sa costituzione de su grupu mistu devet èssere dada comunicatzione pro iscritu a su S'indigu e a su Segretàriu de sa Comuna, dae parte de sos cussizeris interessados.

*Capu IV*  
**COMMISSIONES DE SU CUSSIZU PERMANENTES**

**ART. 8 - Costituzione e cumposizione**

1. Su Cussizu de sa Comuna, pro totu sa durada de sa càrriga, podet costituire in s'internu suo commissiones permanentes, istabilende su nùmeru e sas cumpetèntzias suas e determinende sa cumposizione numèrica issoro.
2. Sas commissiones permanentes sunt costituidas dae cussizeris de sa Comuna chi rapresentant, cun critèriu proportzionale, totu sos grupos e sunt numenados dae su Cussizu cun votazione patente cunforma a sas desinnatziones fatas dae cada grupu.
3. Cando bi sunt dimissiones, decadèntzia o àteru motivu chi fatzat netzessàriu su càmbiu de unu cussizeri, su grupu de su Cussizu de appartenèntzia desinnat tràmite su Capugrupu suo, un'àteru rapresentante e su Cussizu de sa Comuna protzedet a su càmbiu.
4. A sas commissiones permanentes partetzipant, sena diritu de votu, su Sìndigu e sos cumponentes de sa Zunta de sa Comuna cumpetentes pro matèria; a sas riuniones partetzipant, si sunt invitados, sos funtzionàrios chi tenent sa responsabilidade istrutòria de sas pràticas.

**ART. 9 - Presidèntzia e cunvocazione de sas commissiones**

1. Su Presidente de cada commissione permanente est eletu dae sa matessi in s'internu suo, cun votazione patente, a majoria de votos de sos cumponentes. Cando sa commissione tenzat funtziones de controllu o de garantzia, sa presidèntzia est dada a unu cussizeri, sinnaladu dae parte de sos grupos de su Cussizu de minoria.
2. S'eletzione de su Presidente est fata in sa prima riunione de sa commissione chi, cunvocada dae su Sìndigu, est fata intro de binti dies dae sa die in ue est diventada esecutiva sa deliberazione de sa nòmina.
3. Cando est assente su Presidente lu sostituit su cumponente de sa commissione dae su matessi desinnadu a esertzare, in custa occasione, sas funtziones vicàrias. Custa desinnazione est fata e comunicada dae su



Presidente de sa commissione in sa prima riunione chi sightit sa de sa nòmina sua.

4. Su Presidente comunicat a su Sìndigu sa nòmina sua e sa desinnatzione de su cussizeri vicàriu intro de chimbe dies dae s'adotzione de sos provvedimenti relativos.

5. Su Presidente cunvocat e presiedet sa commissione, istabilende sa data de sas adunàntzias e sos argumentos dae chistionare in cada adunàntzia.

6. Sa cunvocatzione est fata dae su Presidente finas a pustis de una dimanda iscrita, cun s'indicatzione de sos argumentos dae chistionare, a su Presidente matessi indirizada dae sos cumponentes de sa commissione, espressione de grupos de su Cussizu chi rapresentant a su nessi unu tertzu de sos cussizeris de sa Comuna assignados. Sa riunione est fata intro de deghe dies dae sa chi sightit sa presentatzione de sa dimanda a su protocollu zenerale de sa Comuna.

7. Sas cunvocatziones, mentovadas in sos commas chi benint in antis, sunt dispostas cun avisu iscritu, chi cuntenit s'indicatzione de sa die, in ue si faghet sa riunione e de s'ordine de sa die dae chistionare, dae batire a sos cumponentes de sa commissione, in su domitzìliu issoro, a su nessi chimbe dies feriales in antis de sa die in ue si faghet s'adunàntzia.

8. Sa cunvocatzione est comunicada, intro de su tèrmine matessi, a su Sìndigu e a sos assessores delegados a sas matèrias dae chistionare in sa riunione, e de sa matessi est inviadu s'ordine de sa die.

### **ART. 10 - Funzionamentu de sas commissiones de su Cussizu permanentes**

1. Sa riunione de sa commissione de su Cussizu permanente est bàlida cando sunt presentes sos cumponentes de grupos de su Cussizu chi rapresentant a su nessi sa meidade de sos cussizeris in càrriga.

2. Sas riuniones de sas commissiones sunt pùbblicas. A sos traballos podent assistire sos tzitadinos e sos rapresentantes de sos òrganos de informatzione. Su Presidente cònvocat sa commissione in riunione secreta petzi pro chistionare de argumentos chi cumportant apretziamentu de su comportamentu e de sa moralidade de pessones o cando sa pubblitzidade de s'adunàntzia podat cumprumìtere in manera grae sos interessos de sa Comuna.

3. Su Sìndigu e sos cumponentes de sa Zunta podent semper partetzipare, cun facultade de relatzione e de interventu in sa discussione de sos argumentos a s'òrdine de sa die, a sas riuniones de totu sas commissiones.

4. Pro s'esàmene de argumentos pretzisos sas commissiones podent invitare a partetzipare a sos traballos issoro organismos assotziados, rapresentantes de fortzas sotziales, polìticas, econòmicas, espressiones rapresentativas de sa comunidade locale.

### **ART. 11 - Funtziones de sas commissiones de su Cussizu permanentes**

1. Sas commissiones permanentes costituint articulatziones de su Cussizu de sa Comuna e esèrtzitant sas funtziones issoro cuncurrende a sos còmputos de indiritzu e de controllu polìticu amministrativu dados a su matessi tràmite sa valutatzione preliminar de sos atos de programmatzione e pianificatzione operativa e finantziària e s'aprofundimentu de sos èsitos periòdicos de su controllu de sa zestione de commo e de sos investimenti. Podent èssere incarrigadas dae su Cussizu de fàghere indàzines pro connòschere su funtzionamentu de sos servìtzios, sa realizatzione de sos programmas, prozetos e interventos, sa zestione de siendas, istitutziones e àteros organismos dipendetes dae sa Comuna.

2. Sas commissiones provident a s'esàmene de sas funtziones mentovadas in su comma chi benint in antis in prus pagu tempus possìbile, riferende a su Cussizu cun relatziones mandadas a su Sìndigu e dae su matessi illustradas in s'assemblea de su Cussizu.

Su Presidente de sa commissione, d'acordu cun su Sìndigu, podet riferire a s'adunàntzia. Sos resultados de sas indàzines pro connòschere sunt riferidos dae su Presidente a sa commissione, intro de su tèrmine istabilidu dae su Cussizu pro su cromptu de s'incàrrigu.

3. Sas commissiones tenent sa podestade de s'initziativa pro sa presentatzione de propostas de deliberatziones e motziones in s'àmbitu de sas matèrias de cumpetèntzia issoro.

**ART. 12 - Segreteria de sas commissiones de su Cussizu permanentes. Verbales de sas riuniones. Pubblitzidade de sos traballos**

1. Sas funtziones de su Segretàriu de sa commissione sunt fatas dae su dipendente de sa Comuna desinnadu dae su responsàbile de su servìtziu. Su Segretàriu providit a cada àteru cromptu netzessàriu e cunseguente a su funtzionamentu de sa commissione. Iscrivet su verbale de sas adunàntzias chi est sutascritu dae su matessi e dae su Presidente de sa commissione e depositadu cun sos atos de s'adunàntzia. Sos verbales sunt aprovados in s'adunàntzia chi s'ghit a sa chi si riferint, cun sos emendamentos chi podent èssere dimandados dae sos cumponentes interessados.

2. Còpias de sos verbales de sas adunàntzias de sas commissiones sunt trasmitidas a su Sìndigu e a su Segretàriu de sa Comuna e sunt depositadas, finas pro estratu, in sos fassìculos de sos atos chi si riferint, a manera chi podent èssere cunsultados dae sos cussizeris de sa Comuna. Custu depòsitu est obligatòriu. Su Sìndigu informat sa Zunta de sos cuntenudos de su verbale e su Segretàriu de sa Comuna signalat a sos responsàbiles de sos servìtzios interessados, indiritzos, osservatziones, rilievos relativos a su chi est de cumpetèntzia issoro. Sos verbales de sa commissione chi chistionat de sas matèrias finantziàrias, sos bilàntzios, su controllu de sa zestione, sos investimenti, sunt trasmitidos finas a su revisore de sos Contos.

*Capu V*  
**COMMISSIONES ISPETZIALES**

**ART. 13 – Commissiones de indàzine riservada**

1. Su Cussizu de sa Comuna, a majoria assoluta de sos cumponentes suos, podet istituire in s'internu suo commissiones de indàzine riservada subra de s'atividade de s'amministratzione, finas cunforma a sas signalatziones fatas dae su revisore de sos contos.

2. Sa deliberatzione chi constituit sa commissione istabilit s'ozetu e s'àmbitu de indàzine e su tèrmine pro l'agabare e riferire a su Cussizu de sa Comuna. De sa commissione faghent parte rapresentantes de totu sos grupos. In su

provedimentu de nòmina, adotadu cun votazione patente, est desinnadu su coordinadore.

3. Sa commissione tenet totu sos poderes netzessàrios pro su cromptu de s'incàrrigu. A pustis de sa dimanda de su coordinadore su Segretàriu de sa Comuna ponet a disponimentu de sa commissione totu sos atos, finas riservados, chi pertocant s'ozetu de s'indàzine o a custu aunidos.

4. Pro buscare totu sos elementos de connoschèntzia netzessàrios pro su cromptu de s'incàrrigu retzidu, sa commissione podet ascurtare su Sìndigu, sos cumponentes de su Cussizu e de sa Zunta, su Revisore, su Segretàriu de sa Comuna, sos responsàbiles de sos ufizios e de sos servìtzios e sos dependentes issoro, sos rapresentantes de sa Comuna in àteros entes e organismos. Sos suzetos invitados pro èssere ascurtados si devent presentare. Sa convocazione e sos èsitos de s'ascurtu abarrant riservadas finas a sa presentazione a su Cussizu, de sa relazione de sa commissione. Finas a cuddu mamentu sos cumponentes de sa commissione e sos suzetos intesos sunt vincolados a su secretu de ufiziu e a sas lezes chi sunt in vigore.

5. Sos verbales de sas commissiones sunt iscritos dae unu funtzionàriu de sa Comuna incarrigadu, a pustis de sa proposta de su coordinadore, dae sa commissione matessi.

6. In sa relazione a su Cussizu sa commissione esponet sos fatos atzertados e sos èsitos de sas indàzines fatas, escludende comunicatziones e riferimentos buscados durante sos *ascurtos* e s'inchiesta chi non sunt resultados in manera diretta o indireta, chi pertocant s'àmbitu de sa matessi: pro custos est mantesu su matessi su secretu de ufiziu mantovadu a su de batos comma chi benit in antis.

7. Su Cussizu de sa Comuna, tenta in cunsideru sa relazione de sa commissione, adotat sos provedimentos cunseguintes si sunt de cumpetèntzia sua o, in situatzione diferente, esprimet a su Sìndigu sos orientamentos suos in mèritu a sas deliberatziones chi sa matessi at a dèvere adotare intro de unu tèrmine istabilidu in antis.

8. Sa Commissione cun la presentazione de sa relazione a su Cussizu concludet s'atividade sua e est isolta. Sos atos e sos verbales sunt dae su coordinadore cunsegnados a su Segretàriu de sa Comuna chi nde faghet una ritzevuda e los custoit in s'archìviu de s'Ente.

## **ART. 14 – Commissiones de istùdiu e consultas**

1. Su Cussizu de sa Comuna podet costituire commissiones chi durant pagu tempus cun s'incàrrigu de istudiare pianos e programmas de particolare importàntzia pro sa comunidade locale, inclùdidos intre sas cumpetènzias atribuidas a su matessi dae sas lezes e dae s'Istatutu. A sas commissiones de istùdiu ant a leare parte sos rapresentantes de totu sos grupos, e finas dependentes de sa Comuna o espertos esternos de cumpetèntzia cumprobada in sas matèrias dae chistionare, isseberados dae su Cussizu de sa Comuna in sa deliberatzione chi constituit sa commissione matessi. Su Cussizu istabilit sos tempos de traballu chi sa commissione devet impreare pro agabare sos traballos.
2. Su Presidente de sa commissione riferit a su Cussizu, de tantu in tantu subra de s'avanzamentu de sos traballos e sutaponet a su matessi, a sa fine de s'incàrrigu, sa relatzione e sos atos chi costituint s'istùdiu fatu.
3. Est riconnotu su chi faghent sas cunsultas de s'ente, chi faghent atividade de collaboratzione consultiva de azudu a s'indiritzu e a sa fase de zestione de sos setores diferentes e interventos de cumpetèntzia de s'ente matessi. Sa realizatzione de su comma presente est dissiplinada dae sa delibera de su Cussizu de istituzione relativa.

### *Capu VI*

## ***SOS CUSSIZERIS ISCRUTADORES***

### **ART. 15 - Desinnu e funtziones**

1. A su cumintzu de cada argumentu in ue siat prevìdida sa votatzione in forma secreta, su Presidente desinnat tres cussizeris, a su sòlitu sos prus zòvanos, incarrighende los de sas funtziones de iscrutadore. Sa minoria devet èssere semper rapresentada, cun unu cussizeri suo, intre sos iscrutadores. S'assistèntzia de sos iscrutadores est obligatòria pro sas votatziones a iscrutìniu secretu. Assistent su Presidente in sa verìfica de sa balididade de sas ischedas e in sa contadura de sos votos.

2. In su verbale de sas adunàntzias devet risultare pro cales deliberatziones s'èsitu de sa votatzione est istadu verificadu cun s'interventu de sos cussizeris iscrutadores.

## **Parte II - SOS CUSSIZERIS DE SA COMUNA**

### *Capu I* **NORMAS ZENERALES**

#### **ART. 16 - Riserva de leze**

1. S'elezione de sos cussizeris de sa Comuna, sa durada in càrriga issoro, su nùmeru de sos cussizeris atribuidu a sa Comuna e sa positzione zurìdica issoro sunt regulados dae sa leze.

### *Capu II* **CUMINTZU E AGABU DE SU MANDADU ELETIVU**

#### **ART. 17 - Intrada in càrriga Cunvàlida**

1. Sos cussizeris de sa Comuna intrant in càrriga cun sa proclamatzione de s'elezione issoro dae parte de su Presidente de s'òrganu elettorale prepostu, segundu s'ordinamentu elettorale amministrativu in vigore, o, si b'at su cambiù, deretu a pustis de s'adotzione de su Cussizu de sa deliberatzione relativa.

2. In sa prima adunàntzia chi sighit a s'elezione su Cussizu de sa Comuna, **in antis de deliberare subra de cale si siat argumentu**, devet esaminare sa cundizione de sos atos e decrarare, cun s'osservàntzia de sas modalidades prescritas, sa inelezibilibidade pro sos chi b'est unu motivu de inelezibilibidade o de incompatibilibidade prevìdidos dae sos artìculos 55 e sos chi sighint de su TUEL aprovadu cun D. lzs. 18/8/2000 n° 267, faghende deretu su càmbiu issoro. Est prevìdida una votatzione ùnica pro totu sos eletos elezìbiles, mentres si faghent votatziones partzidas in sas ocasiones in ue pro sos eletos b'at unu de sos motivos de inelezibilibidade o de incompatibilibidade.

3. Cando b'at s'agabu a pustis, pro cale si siat motivu, de sa càrriga de cussizeri de sa Comuna, si faghent su càmbiu, cunvalidende s'elezione de su

chi in sa lista matessi at otentu su nùmeru prus artu de preferèntzias a pustis de sos eletos, cando s'est verificadu chi non bi sunt motivos de inelezibildade e de incompatibildade prevididas dae sos art. 55 e sos chi sighint de su TUEL aprovalu cun D. lzs. 18/8/2000 n° 267.

### **ART. 18 – Dimissiones**

1. Sas dimissiones dae sa càrriga divent èssere presentadas dae sos cussizeris cun comunicatzione iscrita e sutiscrita, indirizzata a su Cussizu de sa Comuna e dada a su matessi tràmite presentatzione in s'ufitziu protocollu de sa Comuna.
2. No est prevididu chi sa comunicatzione de dimissiones siat integrada dae motivatziones. Si sas dimissiones sunt presentadas divent èssere formuladas in manera crara e esplitzata.
3. Sas dimissiones non sunt revocàbiles dae su mamentu de sa presentatzione issoro e sunt eficatzes deretu. Su càmbiu, adotadu dae su Cussizu, devet èssere fatu intro e no a pustis de deghe dies dae sa data de presentatzione de sas dimissiones matessi.

### **ART. 19 - Decadèntzia e catzadura dae sa càrriga**

1. S'in casu durante su mandadu essit a campu s'esistèntzia de unu motivu de inelezibildade chi fiat esistente in antis de s'eletzione e non catzada in sos tèrmines e in sos modos prevididos dae s'art 60 de su TUEL aprovalu cun D. lzs. 18/8/2000 n°267, su Cussizu de sa Comuna pronùntziat sa decadèntzia dae sa càrriga de su cussizeri interessadu cunforma a s'art. 70 de su TUEL aprovalu cun D. lzs. 18/8/2000 n° 267;
2. Cando a pustis de s'eletzione si verìficat calicuna de sas cunditzones prevididas dae sos art. 55 e sos chi sighint de TUEL aprovalu cun D. lzs. 18/8/2000 n° 267, comente motivu de inelezibildade o bi siat a su mamentu de s'eletzione o si verìficat a pustis calicuna de sas cunditzones de incompatibildade prevididas da sa leze mentovadas in antis, su Cussizu, chi tenet comente componente s'interessadu, la podet cuntestare a su matessi e ativat sa protzedura, si sa cunditzone de inelezibildade o de incompatibildade risultat catzada, su Cussizu lu leat in cunsideru sena

adotare provvedimenti in sos cunfrontos de su cussizeri interessadu. In sa situatzione contrària lu decrarat decàdidu.

3. Sos cumponentes de s'òrganu de su Cussizu podent èssere catzados dae sa càrriga cando fatzant atos contràrios a sa Costituzione; o pro bioladuras de leze graes e continas o pro motivos de òrdine pùbblicu graes; o cando siant imputados de unu de sos reatos prevìdidos dae sa leze de su 13 de cabudanni de su 1982, n. 646 o sutapostos a misura de preventzione o de seguràntzia, segundu cantu disponet s'art. 142 de su TUEL aprovalu cun D. lzs. 18/8/2000 n° 267.

4. Sos cussizeris de sa Comuna decadent dae sa càrriga dae sa data de passazu in zudicadu de sa sentèntzia de cundenna, pro calicunu de sos delitos cunforma a s'art 58 de su TUEL aprovalu cun D. lzs. 18/8/2000 n° 267, o dae sa sentèntzia in ue diventat definitivu su provèdimentu de s'autoridade zudiziària chi cundennat a una misura de preventzione.

5. Su Sìndigu o, in mancàntzia sua, su vitzeSìndigu, connotu unu de sos provvedimenti mantovados in sos commas 3 e 4 chi benint in antis, cunvocat su Cussizu de sa Comuna chi leat in cunsideru sos matessi e adotat sas deliberatziones cunsequentes.

6. Sos cussizeris de sa Comuna chi no intervenint a sas riuniones in zenerale pro tres bias de sighida sena zustificadu motivu sunt decrarados decàdidos cun deliberatzione de su Cussizu de sa Comuna. Gasi, su Sìndigu, a pustis de s'atzertamentu fatu de s'assèntzia cromptada dae su cussizeri interessadu, providit cun comunicatzione iscrita, cunforma a s'art. 7 de sa leze de su 7 de austu de su 1990 n. 241, a li comunicare su cumintzu de su protzedimentu amministrativu. Su cussizeri tenet sa facultade de fàghere bàlere sos motivos zustificativos de sas assèntzias, e finas a dare a su Sìndigu documentos probatòrios eventuales, intro de su tèrmine inditadu in sa comunicatzione iscrita, chi semper e cando non podet èssere inferiore a binti dies, chi cumintzant dae sa data chi si retzit sa comunicatzione matessi. Iscàdidu custu tèrmine ùrtimu, su Cussizu esàminat e a sa fine delibèrat, leados in cunsideru in manera zusta sos motivos zustificativos presentados dae parte de su cussizeri interessadu.

7. Su càmbiu de sos cussizeris decàdidos o catzados dae sa càrriga si faghet in sa riunione matessi chi est decrarada sa decadèntzia, in cunformidade a s'art. 81 de su T.u. de su 16 de maju de su 1960, n. 570, a pustis de sa



verifica de sa mancàntzia de cunditziones de inelezibilidade o incompatibilidade pro su suzetu chi faghet su càmbiu.

### **ART. 20 - Suspensione dae sas funtziones**

1. Sos cumponentes de s'òrganu de su Cussizu podent èssere suspesos dae sas funtziones cun decretu de su prefetu cando bi sunt sos motivos mentovados in su primu e su segundu comma de s'art.142 de su TUEL aprovadu cun D. lzs. 18/8/2000 n° 267 o de s'art. 15 de sa leze de su 19 de martzu de su 1990, n. 55, e modificatziones e integratziones chi s'ghint.

2. Su Sìndigu o su vitzeSìndigu, in mancàntzia sua, retzida còpia de su provedimentu prefetìtziu, cunvocat su Cussizu de sa Comuna chi atzetat sa suspensione decretada. Su Cumponente suspesu, chi faghet parte de s'òrganu de su Cussizu non podet esertzitare peruna de sas funtziones aunidas e cunseguentes a custa càrriga, siat in s'àmbitu de sa Comuna, siat in entes, istitutziones e organismos in ue siat istadu numenadu in rapresentàntzia de sa Comuna.

3. Cando sa suspensione siat istada adotada cunforma a s'art. 59 de su TUEL aprovadu cun D. lzs. 18/8/2000 n° 267, su Cussizu de sa Comuna in sa riunione matessi in ue atzetat su provedimentu de suspensione, faghet su càmbiu temporàneu, dende sa suplèntzia pro s'esertzìtziu de sas funtziones de su cussizeri a su candidadu de sa lista matessi chi at otentu, a pustis de sos eletos, su nùmeru prus artu de votos. Sa suplèntzia finit cun s'agabu de sa suspensione. Cando arribat sa decadèntzia, si faghet su càmbiu cunforma a sos artìculos chi benint in antis.

### ***Capu III*** ***DIRITOS***

### **ART. 21 - Diritu de iniziativa**

1. Sos cussizeris tenent diritu de iniziativa subra de cada argumentu sutapostu a sa deliberatzione de su Cussizu de sa Comuna. Sos cussizeris esertzitant custu diritu tràmite sa presentatzione de propostas de deliberatzione e de emendamentos a sas deliberatziones iscritas a s'òrdine de sa die de su Cussizu.

2. Sos cussizeris tenet sa facultade de presentare propostas de deliberatziones chi pertocant matèrias cumpresas in sa cumpetèntzia de su Cussizu de sa Comuna istabilida dae sa leze e dae s'Istatutu.

3. Sa proposta de deliberatzione, formulada pro iscritu acumpanzada dae una relazione chi illustrat, ambas sutiscritas dae su cussizeri chi proponet, est inviada a su Sìndigu chi la trasmitet a su Segretàriu de sa Comuna pro s'istrutòria cunforma a sos artìculos 49, 150 e 151 de su TUEL aprovalu cun D. lzs. 18/8/2000 n° 267. Su Segretàriu de sa Comuna esprimet pàrrere finas subra de sa cumpetèntzia de su Cussizu a chistionare de s'argumentu. Su Sìndigu iscriet sa proposta a s'òrdine de sa die de su primu Cussizu de sa Comuna inditende, cun s'ozetu, su cussizeri chi proponet.

4. Sos cussizeris tenent sa facultade de presentare emendamentos subra de sas propostas de deliberatziones iscritas a s'òrdine de sa die de su Cussizu de sa Comuna. Sunt emendamentos sas curretziones de forma, sas modificatziones, integrazziones e càmbios partziales de su testu de sa proposta de deliberatzione. Sos emendamentos sunt presentados, in forma iscrita, a su Sìndigu finas in sa die de s'adunàntzia. Cando si tratat de propostas de càmbios de entidade limitada, podent èssere presentadas in forma iscrita a su Sìndigu, durante sa riunione. Cadaunu cussizeri podet modificare o ritirare unu o prus emendamentos, finas a su mamentu in ue sa discussione est serrada. Sas propostas de emendamentos retzidas in antis de s'adunàntzia sunt deretu trasmitidas dae su Sìndigu a su Segretàriu de sa Comuna chi nde cuidat cun protzedura de urzèntzia s'istrutòria. Pro sas propostas de càmbiu de entidade limitada, e finas pro sas modificas a sas propostas de emendamentu presentadas durante s'adunàntzia, su Segretàriu de sa Comuna, cun dimanda de su Presidente, esprimet pàrrere in s'àmbitu de sas cumpetèntzias suas. Cun dimanda fata dae su Segretàriu de sa Comuna, pro cunsiderare sos elementos netzessàrios de valutatzione, s'àtera argumentatzione de sa delìbera est rinviada a pustis de s'ùrtimu puntu a s'òrdine de sa die. Cando custos elementos non podent èssere pigados durante sa riunione, sa deliberatzione est rinviada a s'adunàntzia chi s'ghit.

## **ART. 22 - Diritu de presentazione de interrogatziones, interpellàntzias e motziones**

1. Sos cussizeris tenent diritu de presentare a su Sìndigu interrogatziones, interpellàntzias e motziones subra de argumentos chi pertocant in manera direta sas funtziones de indiritzu e de controllu polìticu-amministrativu de su Cussizu de sa Comuna e sas àteras cumpetènzias atribuidas dae sa leze e dae s'Istatutu a su matessi.
2. **S'interrogatzione** iscrita cunsistet in sa dimanda, firmada comente si tocat, depositada in antis in s'ufitziu protocollu de sa Comuna, e indirizada a su Sìndigu o a sa Zunta pro àere informatziones subra de sa sussistèntzia o sa veridade de unu fatu pretzisu o pro connòschere sos motivos e sos critèrios chi sunt pigados comente riferimentu pro operare pro su chi pertocat unu fatu pretzisu o un'interventu. Sas interrogatziones podent àere finas caràtere ispetivu pro atzertare sa lezitimidade e sa curretesa de s'operadu de s'amministratzione.
3. **S'interpellàntzia** cunsistet in una dimanda fata a su Sìndigu pro su chi pertocat sos motivos, sos intendimentos o sa cunduta de s'amministratzione subra de un'argumentu pretzisu. Otènnida sa risposta dae su Sìndigu, su cussizeri chi dimandat decrarat si est suddisfatu o nono. Est prevìdidu finas s'interventu de rèplica de su Sìndigu. Cando su chi interpellat no est suddisfatu, at a pòdere trasformare s'interpellàntzia in una motzione, chi at a èssere iscrita a s'òrdine de sa die de sa riunione chi sighit de s'òrganu e subra de sa motzione su Cussizu s'at a pronunziare subra de su votu.
4. A sas interrogatziones e interpellàntzias su Sìndigu o s'Assessore delegadu cumpetente pro matèria o, s'in casu, su Segretàriu de sa Comuna, cun autorizzazione orale de su Presidente, podet dare sa risposta orale in sa riunione matessi, o iscrita, intro de 30 dies dae sa presentazione. Su chi proponet podet dimandare chi sa risposta siat dada durante su Cussizu de sa Comuna; in custa situatzione su Sìndigu iscriet sa risposta a s'interrogatzione in sa riunione de su Cussizu chi sighit.
5. Sas interrogatziones, sas interpellàntzias e sas motziones divent èssere presentadas pro iscritu a su protocollu zenerale de s'ente. Sas interrogatziones a pustis ant a èssere iscritas a s'òrdine de sa die in occasione

de sa cunvocatzione de sa prima adunàntzia de su Cussizu, chi s'ghit sa presentatzione issoro, francu in sas ocasiones in ue est fata, durante custa riunione, s'aprovatzione de sas Lìneas programmàticas de mandadu, de su Bilàntziu de previsionone e de su Rendicontu de sa zestione.

6. Sa **motzione**, consegunte a cantu prevèdidu dae su comma 4, chi pretzedet, de s'artìculu presente, cunsistet in una proposta, sutaposta a sa detzisione de su Cussizu de sa Comuna, in s'àmbitu de sas cumpetèntzias pro su matessi istabilidas dae sa leze e dae s'Istatutu, riferida a s'esertzìtziu de sas funtziones de indiritzu e controllu políticu-amministrativu, a sa promotzione de iniziativas e de interventos dae parte de su Cussizu o de sa Zunta in s'àmbitu de s'atividade de sa Comuna e de sos entes e organismos chi appartenint a sa matessi o in sos chi bi partetzipat. Sa motzione si concludet cun una risolutzione e est sutaposta a s'aprovatzione de su Cussizu, in sas formas prevèdidadas pro sa votatzione de sas deliberatziones.

### **ART. 23 - Dimanda de cunvocatzione de su Cussizu**

1. Su Sìndigu devet riunire su Cussizu de sa Comuna, in unu tèrmine non superiore a 20 dies, cando lu dimandat a su nessi unu de chimbe de sos cussizeris in càrriga, ponende a s'òrdine de sa die sos argumentos dae sos matessi dimandados.

2. Su tèrmine, mantovadu in su comma chi benit in antis, cumintzat dae sa die in ue arribat a sa Comuna sa dimanda de sos cussizeris, indiritzada a su Sìndigu, chi est deretu rezistrada a su protocollu zenerale de s'ente.

3. Sa dimanda de cunvocatzione devet cuntènnere, pro cada argumentu inditadu dae iscrriere a s'òrdine de sa die, in allegadu s'ischema de deliberatzione relativu. S'ischema mantovadu at a èssere a pustis sutapostu a s'esàmene de sos pàrreres preventivos prevèdidos, pro cantu pertocat sos responsàbiles de sos servìtzios cunforma a s' 49 de su TUEL aprovadu cun D. lzs. 18/8/2000 n° 267; S'in casu, a pustis, in sa proposta de deliberatzione essint a campu elementos chi pertocant sa netzessidade de providire, cun custos a càrrigu de sa Comuna, cun pesos de ispesa pretzisos, est finas netzessàriu su pàrrere de regularidade contàbile, fatu cunforma a s'artìculu matessi, dae parte de su responsàbile de su servìtziu finantziàriu.

4. Cando b'at inosservàntzia de s'òbbligu de cunvocatzione de su Cussizu, cunforma a su comma 1 de su artìculu presente, e in sas modalidades

inditadas dae su comma 2 e dae su comma 3 de su articulu presente, providit su Prefetu, in cunformidade a cantu istabilidu dae su de bator comma de s'art. 39, comma 5, de su TUEL aprovadu cun D. lzs. 18/8/2000 n° 267.

#### **ART. 24 – Diritu de informatzione e de atzessu a sos atos amministrativos**

1. Sos cussizeris de sa Comuna tenent su diritu de otènnere dae sos ufizios de sa Comuna, dae sas asendas suas, istituziones e entes dipendentes, totu sas informatziones chi tenent issoro, ùtiles a su cromptu de su mandadu eletivu, in sas modalidades e tèrmines istabilidos dae su regulamentu relativu.

2. Sos cussizeris de sa Comuna devent mantènnere su secretu in sas ocasiones pretzisas istabilidas dae sa leze.

#### **ART. 25 – Facultade de biere sos atos**

1. Sos cussizeris de sa Comuna tenent su diritu de biere, in sos oràrios de funtzionamentu de s'ufiziu de segreteria, sas deliberatziones, cun sos documentos relativos aunidos, adotadas dae sa Zunta de sa Comuna e comunicadas a sos capogrupos de su Cussizu.

A sas dimandas pro biere sos atos, dae presentare in forma iscrita in sa modulistica idònea posta a dispositzione dae sa Comuna, si devet rispondere intro de 5 dies.

### *Capu IV*

#### ***ESERTZÌTZIU DE SU MANDADU ELETIVU***

#### **ART. 26 – Diritu de esertzìtziu de mandadu eletivu**

1. Sos cussizeris de sa Comuna, pro s'esertzìtziu de su mandadu eletivu, tenent diritu a sos permissos pagados e a sas aspetativas non pagadas in sos lìmities e a sas cunditziones istabilidas dae su TUEL aprovadu cun D. lzs. 18/8/2000 n° 267.

2. A sos cussizeris de sa Comuna est dèvida s'indennidade de presèntzia pro sa partetzipazione efetiva a cada adunàntzia de su Cussizu e pro non prus de un'adunàntzia a sa die.

3. S'indennidade de presèntzia est dada finas pro sas riuniones de sas commissiones de sa Comuna, istituidas dae sas lezes istatales o regionales, in sa mesura matessi previdida pro sas adunàntzias de su Cussizu dae s'art. 82 de su TUEL aprovadu cun D. lzs. 18/8/2000 n° 267.

4. Sas indennidades de presèntzia, chi ispetant a sos cussizeris de sa Comuna in sas ipòtesis elencadas in antis, non si podent summare intre issas in s'àmbitu de sa die matessi. A sos amministradores, chi tenent s'indennidade de càrriga previdida dae s'art. 82 de su TUEL aprovadu cun D. lzs. 18/8/2000 n° 267, non tenent diritu a s'indennidade de presèntzia pro partetzipare a sas adunàntzias de su Cussizu de sa Comuna e de sas commissiones de su Cussizu permanentes. S'indennidade de presèntzia est dèvida a sos amministradores mentovados in antis pro sa partetzipatzione a sas riuniones de sas commissiones de sa Comuna prevididas dae sas lezes istatales o regionales, mantovados in antis in su comma 3.

5. Sos cussizeris de sa Comuna, delegados in manera formale e ispetzifica dae su Sìndigu a andare, pro resones de su mandadu issoro, a foras de su territòriu de sa Comuna tenent diritu a su rimborsu de sas ispesas de pernотamentu e de tratenimentu documentadas, segundu cantu istabilidu dae sa leze. Custas normas s'aplicant finas pro sa partetzipatzione a sas riuniones de sos òrganos natzionales e regionales de sos assòtzios intre sos entes locales chi tenent importàntzia natzionale.

### **ART. 27 - Proibidura de mandadu imperativu**

1. Cada cussizeri de sa Comuna rapresentat sa comunidade e esèrtzitat sas funtziones suas sena vùnculu de mandadu.
2. In su cromptentu de sas funtziones aunidas a sa càrriga eletiva tenet duncas sa libertade de atzione, de espressione e de votu prena.

### **ART. 28 - Partetzipatzione a sas adunàntzias**

1. Su cussizeri de sa Comuna devet partetzipare a totu sas adunàntzias de su Cussizu.
2. Cando b'at s'assèntzia, sa zustificatzione podet èssere fata tràmite comunicatzione iscrita o verbale motivada, dada a su Sìndigu, chi la comunicat a su Cussizu.

3. Su cussizeri chi s'assentat in manera definitiva dae s'adunàntzia devet in antis de lassare sa sala, avèrtere su Segretàriu a manera chi siat sinzadu in su verbale.

### **ART. 29 - Astensione obligatòria**

1. Su Sìndigu, sos assessores e sos cussizeris de sa Comuna non divent leare parte a discussione e a sa votazione de deliberatziones chi pertocant interessos issoro o de parentes issoro o afines finas a su de bator gradu.

S'obbligu de astensione non s'aplicat a sos provvedimenti normativos o de caràtere zenerale, comente sos pianos urbanìsticos, si no in sas ocasiones in ue bi siat una currelatzione lestra e diretta intre su contenu de sa deliberatzione e sos interessos ispetzìficos o de s'amministradore o de parentes o afines finas a su de bator gradu.

2. Non s'aplicat custu òbliggu a sos raportos de dipendèntzia orgànica a entes diferentes, chi non pertocant sas funtziones direttivas o dirizentziales de raportu contatu diretu cun sa Comuna.

3. Sos Assessores o sos cumponentes de s'òrganu de su Cussizu chi si divent astènnere e/o mancare nde informant su Segretàriu de sa Comuna chi sinzat in su verbale su fatu chi est istadu osservadu custu òbliggu.

### **ART. 30 Responsabilidade personale – Esòneru**

1. Su cussizeri de sa Comuna est responsàbile, in manera personale, de sos votos espressos in favore o contra provvedimenti deliberados dae su Cussizu.

2. Est esente dae cale si siat responsabilidade su cussizeri chi mancat in manera zustificada dae s'adunàntzia o chi pro motivos lezìtimos non apat leadu parte a sa deliberatzione.

3. A sa matessi manera est esente dae responsabilidade, chi sighit a s'adotzione de unu provedimentu deliberativu, su cussizeri chi apat decraradu, in antis de sa votazione, su dissensu suo o apat espressu votu contràriu, dimandende de fàghere risultare in su verbale sa positzione sua.

4. S'aplicant a sos cussizeris de sa Comuna sas dispositziones in matèria de responsabilidades istabilidas dae su primu e dae su de bator comma de s'art. 93 de su TUEL aprovadu cun D. lzs. 18/8/2000 n° 267.

*Capu V*  
**NÒMINAS E INCÀRRIGOS A SOS CUSSIZERIS DE SA COMUNA**

**ART. 31 - Indiritzos pro sas nòminas de cumpetèntzia de su Sìndigu.**

1. Su Cussizu de sa Comuna istabilit sos indiritzos chi su Sìndigu at a dèvere fàghere pro sa nòmina, sa desinnatzione e sa rèveca de sos rapresentantes de sa Comuna in sos entes, asiendas o istitutziones.
2. Custos indiritzos sunt bàlidos pro su perìodu de durada de su mandadu politicu amministrativu in ue abbarrant in càrriga sos òrganos eletivos de sa Comuna.

**ART. 32 - Nòminas e desinnatziones de cussizeris de sa Comuna**

1. Cando sa leze, istatutos o regulamentos riservant in manera espressa a su Cussizu de sa Comuna sa nòmina de sos rapresentantes de su Cussizu matessi in sas asiendas e istitutziones, si providit in riunione pùbblica, cun votu secretu.
2. Cando est prevèdidu, in manera espressa, chi sa nòmina siat fata pro desinnatzione de sos grupos de su Cussizu, competet a cadaunu capugrupu comunicare a sa presidèntzia e a su Cussizu, in riunione pùbblica e in forma patente, su nominativu de su cussizeri desinnadu. Su Cussizu aprovat, cun votu patente, sa nòmina de sos rapresentantes.
3. Cando su cussizeri de sa Comuna nominadu o desinnadu agabat s'incàrrigu, pro dimissiones o pro cale si siat àteru motivu, su Cussizu providit a su càmbiu in sa prima riunione chi sighit a su mamentu chi si verificat sa situatzione.

**ART. 33 - Funtziones rappresentativas**

1. Sos cussizeris partetzipant a sas tzerimònias, tzelebratziones e manifestatziones istabilidas dae s'amministratzione de sa Comuna.
2. Pro sa partetzipatzione de sa Comuna a tzerimònias particulares o tzelebratziones, podet èssere costituita una delegatzione de su Cussizu, cumposta dae unu rapresentante pro cada grupu politicu. Custa intervent paris a su Sìndigu e a sa Zunta de sa Comuna.



## **Parte III - FUNZIONAMENTO DE SU CUSSIZU DE SA COMUNA**

### *Capo I* **CUNVOCATZIONE**

#### **ART. 34 – Cumpetèntzia**

1. Sa cunvocatzione de su Cussizu de sa Comuna est istabilida dae su Sìndigu.
2. Cando su Sìndigu est assente o impèdidu sa cunvocatzione est istabilida dae chie, in manera legale, faghet sas partes de issu, segundu s'istatutu e su regulamentu presente.
3. Cando sa cunvocatzione de su Cussizu est fata obligatòria dae normas de leze o de istatutu, e b'at inosserbàntzia de custu òbliggu providit, in càmbiu, su Prefetu.

#### **ART. 35 – Cunvocatzione**

1. Sa cunvocatzione de su Cussizu de sa Comuna est istabilida tràmite avisos, cun sas modalidades prevididas in su regulamentu presente.
2. S'avisu de cunvocatzione cuntenet s'indicatzione de sa die e de s'ora de s'adunàntzia e de sa sede in ue sa matessi at a èssere fata, cun invitu a sos cussizeris de sa Comuna a bi leare parte. Cando sunt prevididas suspensiones pro pagus tempus de sos traballos durante sa die de riunione, in s'avisu sunt inditados sos oràrios de cumintzu, interruttione e cumintzu de nou de s'adunàntzia. Cando est prevididu chi sos traballos si fatzant in prus dies, sunt inditadas sa data e s'ora de cumintzu de cadauna riunione, cun sa pretzisatzione chi est sa sighidura de s'adunàntzia matessi.
3. S'avisu de cunvocatzione pretzisat si s'adunàntzia tenet caràtere ordinàriu e istraordinàriu o si est cunvocada de urzèntzia.
4. Su Cussizu de sa Comuna est cunvocadu in adunàntzia ordinària pro sos atos fundamentales chi s'ghint: **lìneas programmàticas de mandadu, bilàntzios de cada annu e de prus annos, relatziones previsionales e programmàticas, rendicontos de sa zestione.**

5. Su Cussizu est cunvocado in adunàntzia istraordinària in cada àtera ipòtesi e cando sa matessi siat dimandada a su Sìndigu dae a su nessi unu de chimbe de sos cussizeris in càrriga. In custa ùrtima ipòtesi s'adunàntzia devet èssere cunvocada intro de binti dies dae su depòsitu de sa dimanda in s'ufitziu protocollu de sa Comuna.

6. Su Cussizu est cunvocado de urzèntzia petzi cando bi siant motivos rilevantes e non illonghiabiles chi faghent netzessària s'adunàntzia.

7. In s'avisu devet èssere pretzisadu si s'adunàntzia si faghet in prima o in segunda cunvocatzione; in su matessi est ispetzificadu chi sos argumentos de chistionare sunt sos elencados in s'òrdine de sa die.

8. S'avisu de cunvocatzione e s'òrdine de sa die tenent a sa fine de su fozu su bullu de sa Comuna e firmados dae su Sìndigu o dae su chi faghet sas partes de issu o a su chi li cumpetet, pro leze fàghere sa cunvocatzione.

### **ART. 36 - Òrdine de sa die**

1. S'elencu de sos argumentos dae chistionare in cadauna adunàntzia de su Cussizu de sa Comuna constituit s'òrdine de sa die.

2. Tocat a su Sìndigu de istabilire, retificare o integrare s'òrdine de sa die cun detzisiones autònomas pròpias, francu s'òbbligu de iscrìere sas propostas chi s'agatant in su de bator comma chi sighit.

3. S'initiativa de sas propostas dae iscrìere a s'òrdine de sa die tocat a su Sìndigu, a sa Zunta e a sos cussizeris de sa Comuna, cun sa collaboratzione de su Segretàriu de sa Comuna.

4. Pro sas propostas de deliberatziones, interpellàntzias, motziones e interrogatziones presentadas dae sos cussizeris de sa Comuna, s'osservat cantu est istabilidu dae su regulamentu presente.

5. Sos argumentos sunt inditados in s'òrdine de sa die, bastante chi cun sa brevidade netzessària, cun definitziones craras e ispetzificas, gasi dae cunsentire a sos cussizeris de individuare cun tzertesa s'ozetu.

6. Sunt elencados a distintu in s'àmbitu de s'òrdine de sa die, suta s'indicatzione "*seduta secreta*", sos argumentos chi tenent cunditzones de riservadesa. Totu sos àteros argumentos elencados sunt chistionados in riunione pùbblica.

7. S'òrdine de sa die est inseridu o aunidu a s'avisu de cunvocatzione chi constituit parte integrante de custu.

## **ART. 37 - Avisu de cunvocazione - Cunsinna – Modalidade**

1. S'avisu de cunvocazione de su Cussizu, s'ordine de sa die, devet èssere cunsinnadu in su domitzìliu de su cussizeri, tràmite unu missu de sa Comuna, o de unu dipendente de sa Comuna chi li sunt istadas dadas sas funtziones de missu, o de racumandada R.R.. Su missu dat a sa segreteria de sa Comuna sas decraratziones de cunsinna fata, chi cuntenint s'indicazione de sa die e de s'ora, in ue sa matessi est istada fata, e sa firma de su chi la retzit; sa decrarazione de cunsinna fata podet àere forma de elencu de ritzevuda, chi cumprendet prus cussizeris, in ue sunt postas sas firmas de sos chi retzint e de su missu. Sos documentos, mantovados in antis, sunt custoidos a frunimentu de sos atos de s'adunàntzia de su Cussizu.
2. Sos cussizeris chi no istant in sa Comuna devent desinnare, intro de deghe dies dae sa proclamazione de sa eletzione issoro o dae s'intrada in vigore de su regulamentu presente, unu chi est domitziliadu residente in sa Comuna inditende, cun litera indirizada a su Sìndigu e a su Segretàriu de sa Comuna, su nominativu e s'indiritzu de sa pessone chi li devent èssere cunsinnados sos avisos de cunvocazione e cada àteru atu chi est pertinente a sa càrriga, esonerende s'amministratzione dae cale si siat responsabilidade cando su chi est domitziliadu non providat a cunsinnare a tempus zustu custos documentos.
3. Finas a cando no est istada fata sa desinnatzione mantovada in su comma chi benit in antis, su Sìndigu providit a fàghere ispèdire s'avisu de cunvocazione a su domitzìliu anagràficu de su cussizeri tràmite racumandada postale cun avisu de ritzedda, sena bisonzu de osservare àteras formalidades particulares. S'imbiu devet èssere fatu intro de su tèrmine prevìdidu pro sa cunsinna de s'avisu in su domitzìliu. Cun custu imbiu si cunsiderat osservadu, a ogni efetu, s'òbbligu de cunsinna de s'avisu de cunvocazione e respetados sos tèrmines fissados dae sa leze e dae su regulamentu.
4. Cun dimanda de unu cussizeri singolu, sas notìficas podent èssere fatas finas tràmite sa posta eletrònica o *fax* a sos indiritzos comunicados dae su cussizeri de sa Comuna. Cun custu imbiu si cunsiderat osservadu, a onzi efetu, s'òbbligu de cunsinna de s'avisu de cunvocazione e respetados sos tèrmines fissados dae sa leze e dae su regulamentu.

## **ART. 38 - Avisu de cunvocazione - Cunsinna – Tèrmines**

1. S'avisu de cunvocazione pro sas adunàntzias **ordinàrias** devet èssere cunsinnadu a sos cussizeris a su nessi **5 dies de traballu** in antis de sa riunione (es. pro sa riunione de sa die 15 s'avisu devet èssere cunsinnadu intro de sa die 10 e si in mesu b'est una die de festa, devet èssere cunsinnada su 9).
2. Pro sas adunàntzias **istraidinàrias** sa cunsinna de s'avisu devet èssere fata a su nessi **3 dies de traballu** in antis de sa riunione.
3. Pro sas adunàntzias cunvocadas **de urzèntzia**, s'avisu devet èssere cunsinnadu a su nessi 24 oras in antis de sa riunione.
4. Pro sas adunàntzias de segunda cunvocazione s'avisu devet èssere cunsinnadu a su nessi 24 oras in antis de sa riunione.
5. Cando, a pustis de sa cunsinna de sos avisos de cunvocazione, si divent azùnghere a s'òrdine de sa die de sas adunàntzias ordinàrias e istraidinàrias argumentos urzentes o chi sutzedint, bisonzat nde dare avisu iscritu a sos cussizeris a su nessi 24 oras in antis de sa riunione, comunichende s'ozetu de sos argumentos azuntos.
6. Sos motivos de s'urzèntzia de sas cunvocaciones de su de bator comma e de sos provedimentos azuntos a s'òrdine de sa die de su de ses comma podent èssere sindacados petzi dae su Cussizu de sa Comuna, chi podet istabilire, a majoria de sos presentes, chi sa tratadura issoro siat rinviada a sa die chi sighit o finas a àtera die istabilida dae su Cussizu matessi. S'avisu de su rinvii est comunicadu petzi a sos cussizeris assentes dae s'adunàntzia in su mamentu in ue custu est istadu detzisu.
7. Sa cunsinna eventuale de s'avisu de cunvocazione chi ritardat est sanada cando su cussizeri interessadu partetzipat a s'adunàntzia de su Cussizu in ue est istadu invitadu.
8. A sa cunsinna de s'avisu de cunvocazione sunt aplicados sos artìculos 137 e sos chi sighint de su còdighe de protzedura tzivile. In particolare, cando b'at sa reperibilidade de su cussizeri o de àtera persone lezitimada, sa cunsinna de s'avisu de cunvocazione, cunforma a s'art. 140 de su cpc, s'intendet fata in sa die de afissione de s'avisu de depòsitu e de imbiu de sa noa pro racumandada.

## **ART. 39 - Òrdine de sa die - Pubblicatzione e difusione**

1. S'elencu de sos argumentos dae chistionare in sas adunàntzias ordinàrias e istraordinàrias est publicadu in s'àlbu de sa Comuna in sos chimbe dies e in sos tres dies chi benint in antis a sa riunione. Su missu de sa Comuna est responsabile de su fatu chi custa pubblicatzione est esposta galu in sa die chi benit in antis a sa riunione e in su chi sa matessi si faghet.
2. S'elencu de sos argumentos dae chistionare in sas riuniones cunvocadas de urzèntzia e sos chi sunt relativos a sos argumentos azuntos a s'òrdine de sa die de sas adunàntzias ordinàrias e istraordinàrias, sunt publicados a s'àlbu de sa Comuna a su nessi 24 oras in antis de sa riunione.
3. S'avisu podet èssere publicadu finas in su situ internèt de sa Comuna.

### *Capu II*

## **ORDINAMENTU DE SAS ADUNÀNTZIAS**

### **ART. 40 – Depòsitu de sos atos**

1. Totu sos atos relativos a sos argumentos iscritos a s'òrdine de sa die divent èssere depositados in sa segreteria de sa Comuna, o in àteru ufìtziu inditadu in s'avisu de cunvocatzione, in sa die de s'adunàntzia e in sa die chi benit in antis, si est una riunione istraordinària, e in sas 2 dies chi benint in antis cando est una riunione ordinària. Sos atos relativos a sas adunàntzias cunvocadas de urzèntzia o a argumentos azuntos a s'òrdine de sa die, sunt depositados a su nessi 24 oras in antis de sa riunione.
2. S'oràriu de consultatzione est su de funtzionamentu ordinàriu de s'ufìtziu de segreteria de sa Comuna.
3. Peruna proposta podet èssere sutaposta a deliberatzione definitiva de su Cussizu si no est depositada intro de sos tèrmines mantovados in sos comma chi benint in antis, in su testu cumpletu de sos pàrteres cunforma a s'art. 49 de su TUEL aprovadu cun D. lzs. 18/8/2000 n° 267. Sos cussizeris tenent diritu de consultare sos atos de ufìtziu numenados un'àtera bia o mentovados in sos ischemas de deliberatzione depositada e in sos documentos relativos aunidos.

4. A su cumintzu de s'adunàntzia sas propostas e sos documentos divent èssere depositados in sa sala de s'adunàntzia.

### **ART. 41 - Adunàntzias de prima cunvocatzione**

1. Su Cussizu de sa Comuna, in prima cunvocatzione, non podet deliberare si non intervenint a su nessi n. 6 cussizeris, in prus de su Sìndigu.

2. S'adunàntzia si faghet a s'ora istabilida in s'avisu de cunvocatzione. Su nùmeru de sos presentes est verificadu tràmite s'apellu pro nùmene, fatu dae su Segretàriu de sa Comuna e sos resultados suos sunt sinzados in su verbale. Cando sos cussizeris non siant a su cumintzu presentes in su nùmeru prescitu, su Presidente disponet chi si rinnovat s'apellu cando custu nùmeru risultat cròmpidu.

3. Si colat un'ora dae sa chi est istabilida in s'avisu de cunvocatzione e fatu s'apellu si verìficat sa mancàntzia de su nùmeru de sos cussizeris netzessàriu pro deliberare in manera bàlida, su Presidente faghet sinzare su fatu in su verbale e decrarat s'adunàntzia deserta.

4. A pustis de s'apellu fatu a su cumintzu de s'adunàntzia, si presumet sa presèntzia in àula de su nùmeru de sos cussizeris dimandadu pro sa legalidade de sa riunione. Sos cussizeris chi intrant o chi s'assentant dae s'adunàntzia a pustis de s'apellu, divent avisare su Segretàriu de sa Comuna chi, cando in base a custas comunicatziones verìficat chi sos presentes sunt in nùmeru inferiore a su chi est prevìdidu dae su comma 1 de s'artìculu presente, avertet su Presidente chi podet fàghere cramare in àula sos cussizeris chi si sunt assentados in su mentras e, si nde riconnoschet sa netzessidade, ammaniare chi si fatzat un'àtera bia s'apellu. Cando dae s'apellu risultat chi su nùmeru de sos cussizeris est inferiore a su chi est netzessàriu, su Presidente istabilit sa suspensione temporànea de s'adunàntzia, a discretzione sua dae 5 a 15 minutos, a pustis de custa est fatu un apellu nou de sos presentes. Cando dae su matessi risultat chi su nùmeru de sos presentes est totora inferiore a su chi est prescitu pro sa balididade de s'adunàntzia, custa est decrarada deserta pro sos argumentos chi a su mamentu sunt abarrados dae chistionare. Custu fatu est sinzadu in su verbale, inditende su nùmeru de sos cussizeris presentes in su mamentu chi est serrada sa riunione.

5. Sos cussizeris chi essint dae sa sala prima de sa votazione non si computant in su nùmeru netzessàriu pro fàghere s'adunàntzia legale.

### **ART. 42 - Adunàntzias de segunda cunvocazione**

1. S'adunàntzia de **segunda** cunvocazione si faghet sighire, pro cada argumentu iscritu a s'òrdine de sa die, a àtera riunione risultada deserta pro mancàntzia de su nùmeru legale.

2. S'adunàntzia chi sighit a una prima chi s'est cumintzada cun su nùmeru legale de sos presentes e interrùmpida ca est mancadu su nùmeru mìnimu de sos cussizeris, est finas custa de segunda cunvocazione pro sos afares abarrados dae chistionare in sa prima.

3. In s'adunàntzia de segunda cunvocazione, sas deliberatziones sunt bàlidas bastet chi intervennant a su nessi 4 cussizeris in prus a su Sìndigu.

4. Sa die e s'ora de sas riuniones de segunda cunvocazione sunt istabilidas dae su Sìndigu. Sa cunvocazione est fata cun avisos iscritos chi sunt cunsinnados cun sas modalidades prevididas pro sa prima cunvocazione e in su tèrmine cunforma a su de chimbe comma de s'art. 38.

5. Cando s'avisu mandadu pro sa prima cunvocazione istabilida finas sa die e s'ora pro sa segunda, cando custa est netzessària, su Sìndigu devet mandare s'invitu pro sa matessi petzi a sos cussizeris chi non sunt intervennidos a sa prima cunvocazione o chi sunt resultados assentes in su mamentu chi sa riunione, costituita in manera legale, est istada decrarada deserta. Custos avisos divent èssere cunsinnados a su nessi 24 oras in antis de custa istabilida pro sa segunda cunvocazione.

6. Colada un'ora dae custa istabilida pro su cumintzu de sa riunione de segunda cunvocazione e in ue mancat su nùmeru mìnimu prevididu pro la fàghere bàlida, custa est decrarada deserta.

7. Cando siant iscritos a s'òrdine de sa die de sa riunione de segunda cunvocazione argumentos non inseridos in s'avisu de prima cunvocazione, su Cussizu providit a deliberare subra de custos petzi cando est presente a su nessi 6 cussizeris in prus de su Sìndigu. A su contràriu sos matessi sunt rinviados a un'àtera adunàntzia de prima cunvocazione. Custos argumentos divent èssere iscritos e chistionados in sa riunione a pustis de sos de segunda cunvocazione e pro custos sa riunione tenet su caràtere e cheret sas presèntzias prevididas pro sa prima cunvocazione.

8. Cando bi sunt chistiones rinviadas, in manera voluntària, dae su Cussizu pro s'esàmene de una riunione chi sighit, o de riunione chi sighit a àtera chi est istada interrùmpida, in manera voluntària, pro motivos diferentes dae sa mancàntzia de su nùmeru legale de sos presentes, s'adunàntzia noa mantennit su caràtere de "**prima cunvocatzione**".

### *Capu III* **PUBBLITZIDADE DE SAS ADUNÀNTZIAS**

#### **ART. 43 – Adunàntzias pùbblicas**

1. Sas adunàntzias de su Cussizu de sa Comuna sunt pùbblicas, francu cantu istabilidu dae s'art. 46.
2. In su tretu riservadu a su pùbblicu, chie si siat podet assistere a sas adunàntzias cunforma a su primu comma.

#### **ART. 44 - Rezistratziones àudio e vido**

1. Sunt cunsentidas sas rezistratziones, fatas cun mèdios eletromecànicos e/o audiovisivos, de custas adunàntzias dae parte de su Segretàriu de sa Comuna pro fàghere una verbalizatzione de sos atos curreta. Est possìbile sa ripresa de sas adunàntzias, in misura totale o partziale, tràmite magnetòfonos, videocàmeras e mèdios semper e cando idòneos a custa finalidade, petzi cando devat èssere garantitu su diritu de crònaca, dèvidu a fatos e episòdios de atualidade importante, dae parte de sos òrganos de informatzione, iscritos a su rezistru de su tribunale cumpetente pro territòriu, cunforma a sa normativa in vigore in matèria, a pustis de s'autorizatzione de su Sìndigu. Est proibidu in manera tassativa cada àtera atividade de rezistratzione, in forma de àudio e vido, de sas adunàntzias matessi, chi tenent finalidades diferentes dae sas chi sunt istadas mantovadas in antis. Su Presidente tenet sa facultade, cando b'at inosservàntzia de cantu prevìdidu dae su comma presente, de dispònner s'allontanamentu de sos suzetos chi sunt inadempientes dae s'àula de su Cussizu, finas impreende sa fortza pùbblica.
2. Non est cunsentida sa possibilidade de interventu de su pùbblicu a sas riuniones de s'òrganu de su Cussizu. Su Presidente tenet sa facultade, cando b'at inosservàntzia de cantu prevìdidu dae su comma presente, de dispònner



s'allontanamentu de sos suzetos chi sunt inadempientes dae s'àula de su Cussizu, finas impreende sa fortza pùbblica.

### **ART. 45 - Adunàntzias secretas**

1. S'adunàntzia de su Cussizu de sa Comuna si faghet in forma secreta cando si chistionat de argumentos chi pertocant s'apretziamentu de sas capatzitades, morales, curretesa, capatzidade e cumportamentos de pessones.
2. Sos argumentos dae esaminare in riunione secreta sunt pretzisados in s'òrdine de sa die de s'adunàntzia.
3. Cando in sa discussione de unu argumentu in assemblea pùbblica siant introdudas valutatziones subra de sa moralidade, curretesa, capatzidade e cumportamentos de pessones, su Presidente invitat sos cussizeris a la serrare, sena àteros interventos. Su Cussizu, cun proposta motivada de a su nessi bator cussizeris podet deliberare, a majoria de votos, su passazu in riunione secreta pro sighire su dibatitu. Su Sìndigu, in antis de autorizare su cumintzu un'àtera bia de sos traballos, disponet chi sas pessones istranzas a su Cussizu, esclùdidas sas de su comma chi sighit, essant dae s'àula.
4. Durante sas adunàntzias secretas podent abarrare in àula, sos cumponentes de su Cussizu e su Segretàriu de sa Comuna, vincolados a su secretu de ufitziu.

### **ART. 46 - Adunàntzias “abertas”**

1. Cando si verìficant sas cunditzones particulares prevìdidas dae s'istatutu o motivos importantes de interessu de sa comunidade lu faghent ritènnere netzessàriu, su Sìndigu, intesa sa Zunta podet cunvocare s'adunàntzia “aberta” de su Cussizu de sa Comuna, in sa sede sòlita sua o finas in sos logos particulares prevìdidos dae s'art. 4 de su regulamentu presente.
2. Custas adunàntzias tenent caràtere istraordinàriu e a sas matessi, cun sos cussizeris de sa Comuna, podent èssere invitados Parlamentares, rapresentantes de sa Regione, de sa Provìntzia, de àteras Comunas, de sos organismos de partetzipatzione popolare e de sos assòtzios sotziales, polìticos e, sindacales interessadas a sos temas dae discùtere.
3. In custas particulares adunàntzias, su Presidente, garantende sa libertade prena de espressione de sos cumponentes de su Cussizu de sa Comuna,

cunsentit finas interventos de sos rapresentantes comente a subra invitados, chi batint su cuntributu issoro de opinionones, de connoschèntzias, de sustentu e illustrant a su Cussizu de sa Comuna sos orientamentos de sos entes e de sas partes sotziales rapresentadas.

4. Durante sas adunàntzias “abertas” de su Cussizu de sa Comuna non podent èssere adotadas deliberatziones o assuntos, finas in lìnia de màssima, impignos de ispesa a càrrigu de sa Comuna.

#### *Capo IV* **DISSIPLINA DE SAS ADUNÀNTZIAS**

##### **ART. 47 – Cumportamentu de sos cussizeris**

1. In sa discussione de sos argumentos sos cussizeris de sa Comuna tenent su diritu prus mannu de esprimere apretziamentos críticas, osservatziones e tzensuras, ma custos devent pertocare cundutas, opinionones o cumportamentos politicu amministrativu.

2. Custu diritu est esertzitudu escludende cale si siat riferimentu a sa bida privada e a sas calidades personales de perunu e semper e cando andat mantesu intro de sos lùmites de s’educatzione, de sa prudèntzia e de su respetu tzivile. Non est permissu fàghere imputatzione de intenzione mala, chi podant ofèndere s’onorabilidade de sas pessones.

3. Si unu cussizeri turbat s’òrdine, pronunziat paràgulas iscontzas e faghet dannu a sos printzìpios afirmados in sos commas mentovados in antis, su Presidente lu richiamat, numenende.lu.

4. A pustis de unu segundu richiamu a s’òrdine, fatu a unu matessi cussizeri in sa riunione matessi sena chi a custu nche li importat de sas osservatziones chi li ant fatu, su Presidente li devet proibire de faeddare finas a sa fine de sa chistione in discussione. Si su cussizeri cuntestat sa detzisione, su Cussizu a pustis de una dimanda sua, sena àtera discussione, detzidit cun votatzione in forma patente.

## **ART. 48 - Òrdine de sa discussione**

1. Sos cussizeris de sa Comuna si sedent in s' àula de su Cussizu cun su grupu de appartenèntzia. Cando est dimandadu dae su nessi unu grupu, a su cumintzu s'atribuzione de sos postos est fata dae su Sìndigu.
2. Sos cussizeris partetzipant a sas adunàntzias setzidos in sos postos assignados a issos e faeddant dae su postu issoro a su Presidente e a su Cussizu.
3. Sos cussizeris chi cherent faeddare nde faghent dimanda a su Presidente a su cumintzu de su dibatitu o a sa fine de s'interventu de su collega.
4. Devent èssere evitadas sas discussiones e sos faeddos intre sos cussizeris. Cando bi sunt, su Presidente devet intervènnere doghende sa paràgula a totu sos chi ant dadu orìzine a su faeddu, mantenende la a su cussizeri iscritu a faeddare.
5. Petzi a su Presidente est permissu de interrumpere chie est faeddende, pro richiamu a su regulamentu o a sos tèrmines de durada de sos interventos istabilidos dae su matessi.
6. Cada interventu devet pertocare petzi sa proposta in discussione. S'in casu contràriu su Presidente richiamat a s'òrdine su cussizeri e, cando su matessi sighit a irbariare, li proibit de sighire a faeddare.
7. Perunu interventu, cando siat in sos lìmities istabilidos dae su regulamentu, podet èssere interrumpidu pro sighire in s'adunàntzia chi benit a pustis.

## **ART. 49 – Cumportamentu de su pùbblicu**

1. Su pùbblicu chi partetzipat a sas adunàntzias de su Cussizu devet abbarrare in unu tretu pretzisu riservadu a su matessi, tènnere unu cumportamentu curretu, si devet astènnere dae cada manifestatzione de assensu o contrarietà dae sas opinionones espressas dae sos cussizeris o dae sas detzisiones adotadas dae su Cussizu.
2. Non est permissa s'esposizione de cartellos, istrissones e s'impreu de cale si siat àteru mèdiu chi interferat cun s'esertzìtiu de sas funtziones de su Cussizu o chi disturbet su matessi.
3. Sos poderes pro su mantenimentu de s'òrdine in su tretu de sa sala destinada a su pùbblicu tocant a su Presidente a discretzione sua, chi los esertzitat impreende, cando servit, s'òpera de sos Víziles de su fogu.

4. Sa fortza pùbblica podet intrare in s'àula petzi a pustis de sa dimanda de su Presidente.

5. Cando sas pessones chi partetzipant a s'adunàntzia turbant sos traballos de sa matessi o su pùbblicu presente, su Presidente, a pustis de las difidare a paràgulas a tènnere unu cumportamentu cunforma a cantu istabilidu dae su primu comma, podet ordinare s'allontanamentu dae sa sala finas a su tèrmine de s'adunàntzia. Cando in sa sala de sas adunàntzias si verìficant disordines e risultant inùtiles sos richiamos de su Presidente, issu lassat su sezu e decrarat suspesa sa riunione finas a cando non riprendat su postu suo. Si cando riprendet s'adunàntzia sighint sos disordines su Presidente, la decrarat interrùmpida in manera definitiva. Su Cussizu at a èssere riconvocadu, cun sas modalidades istabilidas dae su regulamentu, pro su cromptu de sos traballos.

#### **ART. 50 - Ammissione de funtzionàrios e consulentes in àula**

1. Su Presidente, peri a pustis de dimanda eventuale de sos cussizeris, pro sos bisonzos de su Cussizu, podet invitare in sa sala sos responsàbiles de sos servìtzios de sa Comuna pro fàghere relatziones o dare informatziones e cantu àteru est netzessàriu.

2. Podent èssere puru invitados consulentes, cumponentes tècnicos de sa commissione edilìtzia, profesionistas incarrigados de prozetatzione e istùdios pro contu de s'amministratzione de sa Comuna, pro dare illustratziones e crarimentos. Durante sos interventos sa riunione no est suspesa, e si sighit in sa verbalizatzione cunforma a s'art. 58 de su regulamentu presente.

3. Fatas sas comunicatziones e rispostu a sas dimandas eventuales fatas dae su Presidente o dae sos cussizeris, sos funtzionàrios mantovados, sos cumponentes tècnicos e consulentes sunt cunzedados e lassant s'àula, abbarrant a dispositzione si gasi est dimandadu.

### *Capo V* **ÒRDINE DE SOS TRABALLOS**

#### **ART. 51 - Òrdine pro chistionare sos argumentos**

1. Su Cussizu de sa Comuna, a pustis de sa verìfica de su nùmeru legale, protzedet a s'esàmene de sos argumentos segundu s'òrdine de sa die. S'òrdine pro chistionare sos argumentos podet èssere modificadu pro detzisione de su Presidente o a pustis de sa dimanda de unu cussizeri, a pustis de votazione in forma patente dae parte de s'òrganu de su Cussizu.
2. Su Cussizu non podet chistionare nen deliberare subra de argumentos chi non sunt iscritos a s'òrdine de sa die de sa riunione, francu cantu istabilidu dae sos commas chi s'ghint.
3. Su Presidente podet fàghere, durante sa riunione, comunicatziones istranzas a sos argumentos a s'òrdine de sa die, cando pertocant fatos de particolare importàntzia subrabennidos o de sos chi apat àpidu noa a riunione cumintzada.

## **ART. 52 - Discussione - Normas zenerales**

1. Agabada sa mostra de un'argumentu dae parte de su relatore, su Presidente dat, in s'òrdine, sa paràgula a sos chi ant pedidu de intervènnere, disponende, pro chi est possìbile, chi sos cussizeris chi appartenent a grupos diferentes faghent a borta a borta. Cando, a pustis chi su Presidente at invitadu sos cussizeris a sa discussione, nemos dimandat sa paràgula, sa proposta est posta in votazione.
2. Cando si chistionat de su matessi argumentu cada cussizeri Capugrupu o su cussizeri dae su matessi incarrigadu de intervènnere pro su grupu podet faeddare pro duas bias, sa prima pro non prus de **deghe** minutos e sa segunda pro non prus de **chimbe**, pro rispòndere a s'interventu de rèplica de su Presidente o de su relatore.
3. Sos àteros cussizeris podent intervènnere in sa matessi discussione una borta, pro non prus de **chimbe** minutos cadaunu e sa segunda pro non prus de **tres** minutos.
4. Su Presidente e s'Assessore delegadu pro matèria podent intervènnere in cale si siat mamentu de sa discussione pro non prus de **deghe** minutos cumplessivos cadaunu.
5. Su Presidente o su relatore replicant in forma breve a sos interventos, assotzende sos chi ant àpidu su matessi ozetu o motivatzione, in su tempus pedidu dae sa natura e nùmeru issoro.

6. Su Presidente, a pustis chi de un'argumentu ant faeddadu totu sos cussizeris chi l'ant dimandadu, fata sa rèplica sua o de su relatore e sas contrarèplicas, decrarat serrada sa discussione.

7. Decrarada serrada sa discussione, sa paràgula podet èssere dada, pro sas decraratziones de votu, petzi a unu cussizeri pro cada grupu e pro sa durada non superiore, pro cadaunu, a unu minutu. Cando unu o prus cussizeris de unu grupu non sunt de acordu cun sa positzione decrarada dae su Capugrupu, tenent su diritu finas issos de intervènnere, pretzisende sa positzione issoro cando dimandant sa paràgula. Sos interventos issoro divent èssere fatos intro de sos limites de tempus subra istabilidu.

8. Sos tèrmines de tempus prevìdidos in sos commas chi benint in antis sunt addopiados pro sas discussiones zenerales relativas a sas lìnias programmaticas de mandadu, a su bilàntziu preventivu, a su rendicontu de sa zestione, e finas a sos pianos reguladores zenerales.

### **ART. 53 - Chistione prezuditziale e suspensiva**

1. Sa **chistione prezuditziale** b'est cando est dimandadu chi un'argumentu non siat discussu, sinzende sos motivos. Sa chistione **prezuditziale** podet èssere posta peri in antis de sa votatzione de sa deliberatzione, proponende su ritiru suo.

2. Sa **chistione suspensiva** b'est cando est dimandadu su rinviu pro chistionare de s'argumentu a àtera adunàntzia, sinzende sos motivos. Podet èssere posta peri in antis de sa votatzione de sa deliberatzione, dimandende chi sa matessi siat rinviada a àtera riunione.

3. Sas chistiones prezuditziales e suspensivas postas in antis de su cumintzu de sa discussione de mèritu sunt esaminadas e postas in votatzione in antis de fàghere s'esàmene de s'argumentu chi si riferint. Subra de sas propostas relativas podent faeddare, in prus de su chi proponet o de unu de issos, cando sa proposta siat istada presentada dae prus cussizeris, unu cussizeri pro cada grupu, pro non prus de tres minutos. Su Cussizu detzidit a majoria de sos presentes, cun votatzione patente.

## **ART. 54 - Fatu personale**

1. Constituit “fatu personale” s’atacu a sa cunduta pròpia o atribuzione de fatos cunsiderados non beros o opinionones e decraratziones diferentes dae sas chi sunt istadas espressas.
2. Su cussizeri chi dimandat sa paràgula pro su fatu personale devet pretzisare sos motivos; su Presidente detzidet si su fatu b’est o nono. Si su cussizeri insistet finas a pustis de sa pronùntzia negativa de su Presidente detzidet su Cussizu, sena discussione, cun votazione patente.
3. Podent rispòndere a chie at pigadu sa paràgula pro su fatu personale petzi su cussizeri o sos cussizeris chi l’ant provocadu. Sos interventos subra de su fatu personale non podent durare, in totu, prus de tres minutos.
4. Cando durante sa discussione unu cussizeri siat acusadu de fatos chi ofendent sa onorabilidade sua, podet pedire a su Presidente de fàghere numenare dae su Cussizu, in s’internu suo, una commissione cumposta dae tres cumponentes chi indagat e riferat subra de sa fundadesa de s’acusa.
5. Sa commissione riferit pro iscritu, intro de su tèrmine chi l’est istadu dadu.
6. Su Cussizu cunstatat sas conclusiones de sa commissione, sena votatziones.

## **ART. 55 - Tèrmine de s’adunàntzia**

1. Agabada s’anàlisi de totu sos argumentos iscritos a s’òrdine de sa die, su Presidente decrarat agabada sa riunione.

### *Capo V*

## ***PARTETZIPAZIONE DE SU SEGRETÀRIU DE SA COMUNA VERBALE***

## **ART. 56 - Sa partetzipazione de su Segretàriu a s’adunàntzia**

1. Su Segretàriu de sa Comuna partetzipat a sas adunàntzias de su Cussizu e esertzitat sas funtziones suas dimandende a su Presidente de intervènnere siat pro dare informatziones e crarimentos pro fatzilitare s’esàmene de

s'argumentu in discussione, siat pro dare su pàrrere suo de cunformidade a sas lezes, a s'istatutu e a sos regulamentos, in atuamentu de s'art. 97, comma 4 lett. d) de su TUEL aprovadu cun D. lzs. 18/8/2000 n°267, cando su Cussizu cheret fàghere una deliberatzione diferente dae sa proposta subra de sa cale issu at espressu su pàrrere de cumpetèntzia in sede istrutòria.

### **ART. 57 - Su verbale de s'adunàntzia - Redatzione e firma**

1. Su verbale de sas adunàntzias est s'atu pùbblicu chi documentat sa voluntade espressa, tràmite sas deliberatziones adotadas, dae su Cussizu de sa Comuna.
2. Sa redatzione sua est fata, segundu cantu istabilidu dae s'istatutu, dae su Segretàriu de sa Comuna.
3. Su verbale costituit su resocontu fidele de s'andamentu de sa riunione de su Cussizu e riportat sos motivos printzipales de sas discussiones, su testu integrale de sa parte dispositiva de sa deliberatzione e su nùmeru de sos votos favorevoles, cuntràrios e astenudos subra de cada proposta. Dae custu devet risultare cando sa riunione est istada fata in forma secreta e si sa votatzione est istada fata a iscrutìniu secretu.
4. Sos interventos e sas decraratziones chi sunt fatas dae sos cussizeris durante sas discussiones sunt riportados in s'ntesi esprimende cun sa craresa màssima possìbile sos cuntzetos espressos dae cada oratore. Cando sos interessados dimandant s'inserimentu de sos interventos pròpios in forma integrale e completa, custos divent èssere zai dotados de su testu iscritu pròpiu de interventu e dae sos matessi firmadu, e nde divent dare còpia a su Segretàriu de sa Comuna, in su matessi mamentu o a pustis de sa letura fata de su matessi.
5. Su verbale de sa riunione secreta est redadu a manera chi cuntenit sa s'ntesi de sa discussione, sena ispetzificare sos particulares chi podent fàghere dannu sas pessones, francu cando si devant esprimere zudìtzios subra de s'operadu issoro.
6. Cando si chistionat subra de sos problemas chi pertocant sos interessos patrimoniales de sa Comuna, su verbale devet èssere cumpiladu a manera chi non si cumpromitant sos interessos matessi cunfronte a sos tertzos.
7. Su verbale de sas adunàntzias est firmadu dae su Presidente de s'adunàntzia e dae su Segretàriu de sa Comuna.



## **PARTE IV - SAS DELIBERATZIONES**

### *Capo I* **SAS DELIBERATZIONES**

#### **ART. 58 - Verbale – Depòsitu**

1. Sos verbales de sas riuniones de su Cussizu de sa Comuna sunt depositados in s'archìviu de sa Comuna dae su responsàbile de s'ufitziu segreteria.

#### **ART. 59 - Forma e contenidos**

1. S'atu deliberativu adotadu dae su Cussizu de sa Comuna devet cuntènnere totu sos elementos essenziali, netzèssarios a manera chi siat bàlidu e eficatze. Totu sos atos divent èssere motivados.

2. Subra de cada proposta de deliberatzione devet èssere dadu su pàrrere, in òrdine a petzi sa regolaridade tècnica e contàbile, siat de su responsàbile de su servìtziu interessadu e de su responsàbile de ragioneria. Sos pàrreres divent èssere postos in sa deliberatzione. Sos impignos eventuales de ispesa non podent èssere pigados sena s'atestatzione, chi b'at cantidade de dinare bastante, dae parte de su responsàbile de su servìtziu finanziàriu. Sena custa atestatzione s'atu est nullu de diritu.

3. Cando s'ente non tenzat su responsàbile de su servìtziu interessadu, su pàrrere est dadu dae su Segretàriu de sa Comuna, in relatzione a sas cumpetènzias suas.

4. S'istrutòria de sa deliberatzione est fata dae sos responsàbiles de sos ufizios chi formulant su testu de sa proposta de deliberatzione; su Segretàriu de sa Comuna faghet a manera chi sos pàrreres siant dados cun craesa, a manera de assicurare a su Cussizu de sa Comuna totu sos elementos de valutatzione netzessàrios pro pigare sas detzisiones chi ispetant a su matessi.

5. Cando su testu de sa deliberatzione propostu, depositadu in sos tèrmines istabilidos dae su regulamentu, no est emanadu durante sos traballos de su Cussizu, custu est sutapostu a votatzione.

6. Cando su testu de sa deliberatzione propositu est emendadu durante su dibatitu, subra de sos emendamentos si pronuntziat su Segretàriu de sa Comuna pro su chi est de cumpetèntzia sua cunforma a s'art. 21 e su testu de su dispositivu de s'atu emendadu est letu a su Cussizu in antis de sa votazione, paris cun su pàrrere dadu dae su Segretàriu.

7. Su coordinamentu tènicu de s'atu est fatu durante su protzedimentu deliberativu. Cando si faghet su verbale podent essere fatos dae su Segretàriu de sa Comuna, petzi perfetzionamentos de caràtere leterale.

8. De totu sos pàrreres obligatòrios de àteros organismos e entes devet èssere riportadu su contenedu. Cando est eficatze s'atu conclusivu de su Cussizu e sos estremos in sa parte narrativa de s'atu. Si sos pàrreres non sunt dados in sos tèrmines prevididos dae s'art. 139 TUEL aprovadu cun D. lzs. 18/8/2000 n° 267 o dae àteras dispositziones lezislativas o regulamentares, non si cunsiderant custos, *faghende nde cunstatare* in s'atu, sinzende sos estremos de sa dimanda presentada dae sa Comuna e s'indicatzione de su tempus coladu.

### **ART. 60 - Aprovatzione - Rèvoca – Modìfica**

1. Su Cussizu de sa Comuna aprovende las, cun sas modalidades mentovadas in sos artìculos chi sighint, adotat sas deliberatziones segundu su testu, orizinàriu o emendadu, cunforma a s'ischema propositu in votazione.

2. Su Cussizu de sa Comuna, segundu sos printzìpios de s'autotutela, tenet su podere de providire a discretzione sua a sa rèvoca, modìfica, integratzione e càmbiu de sas deliberatziones pròpias, interpretare custas in manera autèntica, in particolare cando si verìficant o si presentant fatos e situatziones chi non sunt istados balutados in su mamentu de s'adotzione de su provedimentu.

3. In sos provedimentos de su Cussizu de sa Comuna comente in su comma chi benit in antis devet èssere mentovada sa voluntade de s'òrganu de revocare, modificare, integrare o cambiare sa deliberatzione zai adotada, richiamende nde sos estremos.

4. Cando sos atos chi disponent rèvocas, modìficas, integratziones o càmbios de

deliberatziones fatas in antis executivas cumportent, pro efetu de sas positziones chi mentras si sunt constituidas o si sunt pigadas, dannos a tertzos, sos atos matessi prevident formas diretas a dissiplinare sos raportos relativos.

## *Capo II* **SAS VOTATZIONES**

### **ART. 61 - Modalidades zenerales**

1. S'espressione de votu de sos cussizeris de sa Comuna est fata, a su sòlitu, in forma patente.
2. Sas votatziones in forma patente sunt fatas cun sas modalidades mentovadas in sos artìculos 63 e 64 chi sighint.
3. Sas votatziones in forma secreta sunt fatas cando siant prescritas in manera crara dae sa leze o dae s'istatutu e cando su Cussizu devet esprimere, cun su votu, s'apretziamentu e sa valutazione de sas calidades e de sos cumportamentos de sas pessones.
4. Non si podent fàghere votatziones de ballotazu, francu chi sa leze dispongat in manera diferente.
5. Sa votatzione non podet èssere fata si in su mamentu de sa matessi sos cussizeris non sunt presentes in su nùmeru netzessàriu pro fàghere s'adunàntzia legale e, cando est prevididu dae sa leze, dae s'istatutu e dae su regulamentu presente, pro sa lezitimidade de sa votatzione.
6. Subra de cada argumentu s'òrdine de sa votatzione est istabilidu comente sighit:
  - \*Sa votatzione pro sa chistione prezuditziale si faghet in antis de cumintzare s'esàmene de s'argumentu;
  - \*Sas propostas de emendamentu si votant in s'òrdine chi sighit:
    - emendamentos supressivos;
    - emendamentos modificativos;
    - emendamentos azuntivos;
  - \*Pro sos provedimentos cumpostos dae partes diferentes, commas o artìculos, cando a su nessi unu tertzu de sos cussizeris at dimandadu chi siant votados pro divisione, sa votatzione est fata pro cadauna parte chi si siat dimandada

sa partzidura, in s'òrdine chi sas partes matessi costituint s'ischema de atu deliberativu;

\*Sos provvedimenti pro sos cales siant istados aprovados emendamentos o modìficas sunt a sa fine votados in su testu definitivu, chi risultat dae s'ischema orizinàriu modificadu in conformidade a cantu detzisu in antis.

Cada proposta de deliberatzione cumportat votatzione diferente.

7. Pro sos regulamentos e sos bilàntzios sas votatziones sunt fatas cun sas modalidades chi s'ghint:

\*Pro sos regulamentos su Presidente invitat sos cussizeris a fàghere connòschere subra de cales artìculos custos presentant propostas de modìfica e/o catzadura, formuladas pro iscritu; discussas e votadas custas propostas, su testu definitivu de su regulamentu est postu in votatzione in su complessu suo, in forma patente;

\*Pro sos bilàntzios, fata sa discussione zenerale, sunt postos in votatzione, paris, su bilàntziu annuale frunidu de sa relazione de prevision e programmàtica e de su bilàntziu pro prus annos e sas àteras determinatziones compresas in s'ischema de deliberatzione propostu dae sa Zunta e sas modificatziones eventuales presentadas durante su perìodu de depòsitu.

7. Cando est cumintzada sa votatzione, no est prus cunsentidu a nemos de fàghere interventos, finas a sa proclamatzione de sos resultados. Sunt cunsentidos petzi richiamos curtzos meda a sas dispositziones de s' istatutu e de su regulamentu, relativos a sas modalidades de sas votatziones in corsu.

## **ART. 62 - Votatzione in forma patente**

1. In sas votatziones in forma patente sos cussizeris votant pro arziada de manu.

2. Su Presidente ponet a sos votos su provedimentu propostu, invitende a votare in antis sos chi sunt favorevoles, a pustis sos contràrios e a sa fine sos astènnidos a inditare sa positzione issoro.

3. Controlladu s'èsitu de sa votatzione cun sa collaboratzione de su Segretàriu de sa Comuna, su Presidente nde proclamat su risultadu.

4. Sa votatzione est suzeta a contraprova, si custa est dimandada finas dae petzi unu cussizeri, bastet chi siat a pustis deretu chi est istada fata.

5. Sos cussizeris chi votant contra sa deliberatzione o s'astennent e chi intendent chi sa positzione issoro risultet pro nùmene in su verbale, lu divent decrarare in antis o deretu a pustis s'espressione de su votu o s'astentzione.

### **ART. 63 - Votatzione pro apellu pro nùmene**

1. Sa votazione pro apellu pro nùmene si faghet cando est prescrita dae sa leze o dae s'istatutu o in custu sensu si siat pronunziadu su Cussizu, a pustis de sa proposta de su Presidente o de a su nessi unu de chimbe de sos cussizeris.

2. Su Presidente pretzisat a su Cussizu su significadu de su "eja", favorevole a sa deliberatzione proposta, e de su "nono", contràriu a sa matessi.

3. Su Segretàriu de sa Comuna faghet s'apellu, e a custu sos cussizeris risponent votende a boghe arta e su risultadu de sas votatziones est verificadu e riconnòschidu dae su Presidente, cun s'assistèntzia de sos iscrutadores e de su Segretàriu matessi.

4. Su votu espressu dae cada cussizeris in sas votatziones pro apellu pro nùmene est annotadu in su verbale.

### **ART. 64 - Votatziones secretas**

1. Sa votazione tràmite iscrutìniu secretu est fata, a segunda de sa situatzione, cun sas ischedas.

2. In sas votatziones tràmite sas ischedas si protzedit comente sighit:

\* Sas ischedas sunt predispostas dae sa segreteria de sa Comuna, in biancu, aguales de colore e formadu, sena sinzos de riconnoschimentu e cun su timbru de sa Comuna;

\* Cada cussizeri iscrit in s'ischeda sos nùmenes de sos chi cheret elèzere, in su nùmeru inditadu in s'ischema de deliberatzione sutapostu a su Cussizu. Sos nominativos iscritos in s'ischeda in prus de su nùmeru prevìdidu si cunsiderant comente no iscritos, cumintzende, in s'òrdine de rezistratzione, dae su primu in prus.

3. Cando sa leze, sos istatutos o sos regulamentos istabilint chi intre sos chi sunt istados numenados bi devet èssere una rapresentàntzia predeterminada de sa majoria e de sa minoria e non siant pretzisadas in manera crara sas normas chi dissiplinat s'eletzione, su Presidente istabilit sas modalidades de

sa votazione a manera de assicurare custas rapresentàntzias. Cada cussizeri podet èssere invitadu a votare petzi unu nùmene o unu nùmeru limitadu de nominativos, abarrende eletos sos chi ant otentu su nùmeru prus mannu de sos votos.

4. Sos chi votant ischeda bianca sunt computados comente votantes.

5. Sos cussizeris chi s'astennent dae sa votazione lu divent comunicare a su Presidente, a manera chi nde siat pigadu atu verbale.

6. Agabada sa votazione su Presidente, cun s'assistèntzia de sos iscrutadores e de su Segretàriu, protzedet a s'ispòlliu de sas ischedas, a su compudu de sos votos e comunicat a su Cussizu su risultadu, proclamende sos chi sunt istados eletos.

7. Agabada sa votazione su Presidente, cun s'assistèntzia de sos iscrutadores e de su Segretàriu, faghet su compudu de sos votos e comunicat a su Cussizu su risultadu.

8. Su nùmeru de sas ischedas votadas devet currispòndere a su nùmeru de sos cussizeris chi votant, costituidu dae sos cussizeris presentes francu sos chi s'astennent.

9. Cando b'at irregularidade e cando su nùmeru de sos votos bàlidos risultat diferente dae su de sos chi votant, su Presidente annullat sa votazione e nde disponet deretu sa ripetizione.

10. Su caràtere "secretu" de sa votazione devet risultare dae su verbale in ue si devet cunfirmare chi sas operatziones de iscrutìniu sunt istadas fatas cun sa partecipatzione de sos cussizeris iscrutadores.

11. Sas ischedas sunt a pustis dirrutas, a su tèrmine de sa riunione de su Cussizu, francu determinatzione diferente.

## **ART. 65 - Èsitu de sas votatziones**

1. Francu chi pro sos provvedimenti, in manera espressa prevìdidos dae sas lezes o dae s'istatutu, chi cherent unu "quorum" ispetziale de majoria de votos, cada deliberatzione de su Cussizu de sa Comuna s'intendet aprovada cando apat otentu su votu favorevole de sa majoria de sos chi votant, o unu nùmeru de votos a favore paris a su nessi a sa meidade prus unu de sos chi votant. Si su nùmeru de sos chi votant est dìspari, sa majoria assoluta est dada dae unu nùmeru de votos favorevoles chi, addopiadu, dat unu nùmeru superiore in una unitade a su totale de sos chi votant.

2. Sos cussizeris chi s'astennent dae su votu si computant in unu nùmeru netzessàriu pro fàghere s'adunàntzia legale, ma non in su nùmeru de sos chi votant.
3. Sas ischedas biancas e nullas si computant pro istabilire sa majoria de sos chi votant.
4. Cando b'at paridade de votos sa proposta no est aprovada. Sa votazione no aprovada pro paridade de votos no esaurit s'argumentu postu a s'òrdine de sa die e duncas non precludet sa rinnovazione de su votu in sa riunione matessi.
5. Francu cando in situatziones particulares prevididas in manera crara dae sa leze o dae s'istatutu, una deliberazione no aprovada in sa segunda votazione o respinta in sa prima non podet, in sa matessi adunàntzia, èssere galu ozetu de discussione e de votazione podet èssere riproposta a su Cussizu petzi in una adunàntzia chi sighit. A pustis s'annunziu de s'èsitu de sa votazione su Presidente concludet s'interventu suo cun sa fòrmula “ su Cussizu at aprovadu” o “ su Cussizu no at aprovadu”.
6. In su verbale est inditadu in manera pretzisa su nùmeru de votos favorevoles e cuntràrios a sa proposta e su de sos chi s'astennent. In sas votaciones cun ischedas est inditadu su nùmeru de sos votos otènnidu dae cada nominativu, inclùdidos sos no eletos.

### **ART. 66 – Deliberatziones deretu eseguìbiles**

1. Cando b'at un'urzèntzia sas deliberatziones de su Cussizu de sa Comuna podent èssere decraradas deretu eseguìbiles cun su votu espressu dae sa majoria de sos cumponentes, cunforma a s'art. dell'134 de su D.lzs. n° 267/2000.
2. Sa decrarazione de eseguibilità dereta si faghet a pustis de s'aprovazione fata de sa deliberazione, cun votazione separada, espressa in forma patente.
3. Sa trasmissione eventuale a s'òrganu de controllu de sas deliberatziones decraradas deretu eseguìbiles pro motivos de urzèntzia, si faghet intro de sete dies dae s'adotzione, si nono decadit.

*Parte V*  
**DISPOSIZIONES FINALES**

**ART. 67 - Intrada in vigore**

1. Su regulamentu presente at a intrare in vigore a pustis chi at a èssere esecutiva sa deliberatzione chi l'at aprovadu.
2. A pustis de sa esecutividade de sa deliberatzione su regulamentu est publicadu in s'àlbu de sa Comuna pro àteros 15 dies.

**ART. 68 – Difusione**

1. Còpia de su regulamentu presente est mandada dae su Sìndagu a sos cussizeris de sa Comuna in càrriga.
2. Còpias de su regulamentu divent èssere depositadas in sa sala de sas adunàntzias de su Cussizu de sa Comuna durante sas riuniones, a dispositzione de sos cussizeris.
3. Còpia de su regulamentu est mandada, cuidada dae su Sìndigu eletu dae pagu tempus, a sos cussizeris eletos dae pagus tempus, a pustis de sa proclamatzione de s'eletzione.